

# Ahabw'enki Nootaka? Gamba!

Jeffersonville, Indiana, USA

Okwamushanju 14, 1963

1 Mukama abahe omugisha! Ka tugume twemereire ahabw'akaanya kakye, obwo turiyo nitwinika emitwe yaitu. Hariho eky'okushabira ky'omutaano? Ku oraabe nooyenda, ka kimanywe orikwimutsya emikono yaawe ahari Ruhanga reero ogambe, ahabw'ekyo oti, "Mukama, Noomanya ekyetengo kyangye."

2 Taata w'omu Iguru, buzima kwo turi-turi abantu abaine omugisha akasheeshe aka, ahabw'okuteeranira hamwe omu nju ya Ruhanga, obwo turikumanya ngu hariho baingi abaakubaire nibenda kuba bari omu nju ya Ruhanga akasheeshe aka, kwonka bari omu marwariro n'aha bitanda by'abarwaire. Mbwenu Waatuha omugisha ogu okuba hanu eriizooba. Kandi titwaija, Mukama, kureebana, n'obu turaabe nitukunda kukwatanisa hamwe; kwonka ekyo tukaabaasize kukikorera omu maka gaitu. Kureka twaija hanu kukwatanisa n'Ogwo Owaatuteeranira hamwe nk'abaana n'ab'eishe-emwe abu arikukunda.

Nitukusiima hati. Kandi omuringo gwonka oguturikumanya kukwatanisizamu Naiwe kurungi n'omu Kigambo Kyawe. Ekigambo Kyawe nigo Mazima. Twateeranira hanu kugira ngu tutungye amaani g'omwoyo. Nitugeetenga, Mukama. Nituteekwa kugira amaani kugumisiririza emisharaba ei twekoreire. Kandi nitushaba ngu Otwoherereze Omwoyo Orirkwera w'amaani eriizooba, reero atwongyere amaani twena. Garukamu okushaba kw'abantu Baawe nk'oku baayeteerana kandi bakaimutsya emikono yaabo Ahariiwe, kworeka ku baine ekyetengo ky'ebintu ebyo. Garukamu buri omwe, Mukama.

3 Nitukusiima ahabw'okukiza amagara g'Ow'eishe-emwekazi mugyenzi waitu Ungren ekiro ekihweire, omuri butandu omu nkuuto eruguru hanu. Obabeeere omunyambabazi, Mukama, kandi Nitukusiima ahabw'ekyo. Mbwenu hati nitushaba, Taata ow'omu Iguru, ngu Ogumizemu kuba naitwe kandi otuhwere twaba nitugumizamu orugyendo, twena hamwe. Otuzirikye amaani Gaawe n'o-okwikiriza kw'okumanya ngu Okubaho Kwawe okutaremwa nikuza kuba hamwe naitwe. Omu shaaha egoy obu tutarikubaasa kwehwera, nitumanya ngu "Baamaraike ba Ruhanga bateera amahema okwehinguririza Abarikumutiina, kandi Baryatutega emikono yaabo ngu turekye kuhikiza ebogyere byaitu aha ibaare." Kandi nitushaba hati ngu Otuhe aha migisha Yaawe ahabw'Ekigambo, kandi gamba noorabira omuriitwe, n'omuriitwe, omu Iziina rya Yesu Kristo. Amiina.

4 Ninsima ahabw'okushanga ngu omushana gw'aheeru, omushana gw'eizooba, nigwaka. Haaba hari habi munonga akasheeshe aka. Kandi ninteekekake, omu ihanga eri, okukira munonga, twine obwire bw'ekibunda bwingi munonga, embeera y'embeho erikurutsya. Mbwenu okureeba eizooba niryaka, nirirugayo, ni kirungi munonga.

Okugaruka kweteerana hamwe kw'eka eriizooba, mbugaine na barumuna bangye, kandi bari eruguru omu ka ya munyaanyazi, kandi na bamwe aha banyabuzaare baitu kuruga embaju zonna omu rurembo n'okurwetooroora hanu. N'ekika kihango kya Baabranham. Boona ku baakweteerana hamwe kuruga Kentucky, omunda hanu, ninteebereza kikaatwetaagisa kupangisa orurembo; ni baingi munonga. Kwonka kubaire kuri okugaruka omu ka kakye. Twena tukaba tuteeranira hamwe omu nju ya maawe, kandi akaba ari enkondo nkuru eyaabaire eturundaanira hamwe, nka batyo. Kwonka Ruhanga akatwara egoy nkondo omu Iguru, kandi nyine amatsiko ngu twena nitwija kubuganirayo ekiro kimwe.

5 Kandi hati nkagamba ekiro kiri, naagira nti, "Nimumanya, niinyikiriza ngu niinyija-niinyija kucwa bugufu obutumwa bwangye bwa Sande mbuhitsye nk'aha dakiika makumi abiri, reero-reero, nari makumi ashatu, reero nshabire abarwaire." Mbwenu ekyo naakteekateekaho akasheeshe aka.

Kandi nteekateekire ekiro ekihweire, obu Ow'eishe-emwekazi Downing anteereire esimu kandi akagira ngu, ateereire Billy esimu reero yaagira ngu we n'Ow'eishe-emwekazi Ungren ku baabaire bari omu muhanda nibanyegyera, baaterera baruga omu muhanda kandi emotoka yaasiisikara. Kandi Billy ku abaire akiri omu dirisa, aho, tindikumanya zibaire ziri shaaha zingahi; obundi akasheeshe aka, obwire obundi. Mbaire ngwejegyeireho kakye. Naareeba ow'Ow'eishe-emwe Wood, etaara zibaire ziraire. Reero naatsimba amaju kushaba, kandi ku nshabire, Ekintu kyangambira kiti, "Tihariho nshonga." N'ahabw'ekyo naagambira Billy nti, "Mugambire ngu, 'Buri kintu,' ninteekekake ntu, 'nikiza kuba kurungi.'" Naashemererwa munonga kubareeba barimu akasheeshe aka, kandi bashutami omu nju ya Mukama, enyima hanu ahanyima y'okuruga omu ruguuto.

Abantu abarikukukunda munonga batyo, kwija kuhurira Engiri nibaruga omuri zaamahiro amagana, reero naateekateek nti, "Obutumwa bw'edakiika makumi abiri, kandi n'oku ndikubuurira mpura mpura, tikiabagasira na kakye." N'ahabw'ekyo naateekateek ntu ninza kufa . . . buraingwa nk'obwo.

N'ahabw'ekyo, naahurira Ow'eishe-emwe Ungren, omutabani we, akasheeshe aka, naayeshongora ngu, "K'Ori Mukuru." Aine . . . Naamanyisa kihango ahariwe akasheeshe aka okukira oku kibaire kiri nyomwabazyo eihangwe, ahabw'okuba Ruhanga omukuru w'Eiguru ajunire amagara ga nyina n'ow'eishe-emwekazi ab'omuhendo, abakundwa.

6 Hati, eriizooba, twine ekihika ky'okugira obwire burungi omuri Mukama. Kandi mbaire nyine hanu amashomo abiri nari ashatu agatarikushushana agu mbaire nindeeba, kwonka timbaasize, timbaasize kusharamu eri naakugambaho akasheeshe aka. Rimwe ribaire riri, "Mwegyekyerere okushoberwa kwawe, ahakuba Naakutaho omutima. Hati, ku araabe Naakutaho omutima, ahabw'enki iwe otarikumutaho omutima?"

N'abw'ekyo ondiijo, Billy Paulo, tari Billy Paulo . . . Mutabani wangye ondiijo, Yosefu, akandeetera eishomo eri obwire buraingwa obwahweire. Akaba ashutami omu kishengye ekiru kimwe, reero yaagamba, naaranzya ahaiguru aha kishushani, kandi Billy. . . Nimmanyisa, Yosefu naakunda amaato munonga, nk'aboojo bato boona; amaato hamwe n'embaraasi, nimumanya. Reero yangira ati, "Taata, Yesu aine eryato?"

Naanye naagira nti, "Tindikumanya."

7 N'ahabw'ekyo ku yaaherize kwimuka kandi akashora aheeru, naatandika kuteekateeka nti, "Aine eryato?" Reero naiha eishomo omuri ekyo, kandi naarihendiika hanu omu kitabo kyangye, "Yesu aine eryato?" Reero naatandika kuteekateeka. Obu Yaabaire ari hanu omu nsi, Kikamwetaagisa kutiiza nyinenda kugira ngu azaarwe, ekituuro ky'okuziikwamu, eryato ry'okubuuririram, kwonka Niwe Murimbi w'emeeri eya ira ya Saayuuni. Buzima, Ariine. Kwonka, kandi ago mashomo agu mbaire nintekateekaho, nintekateeka ngu obundi nimbaasa kugabuurira bwanyima, tutakagarukireyo.

Nimumanya, ninkunda kubuurira omuri Tabirinaakuuru hanu, ahabw'okuba n'ekanisa yaitu. Nituhurira twine obugabe bw'okugamba kyona eki Omwoyo Orikwera arikugamba. Omu myanya endijo, n'obu omuntu ogwo arikuba naayenda ngu ohurire oine obugabe, nooyehurira ori nk'otagwirwe gye kakye ahabw'okugira ngu-ngu ori omu kanisa y'ondijio muntu, kandi nooyenda kuba omushaija muzima munonga kutamu ekitiinisa eebiteekateeko byabo n'enyegeyesa zaabo.

8 Ngizire obwire burungi munonga saabiiti egi eifo okwo ow'Ow'eishe-emwe Burcham. Kandi ngiire omu ikorero omu barikukorera amajuta g'okurya. Nimureeba n'omukazi we, n'omutabani kandi n'abandi, bari hanu akasheeshe aka. Kandi burijo nkaba nteekateeka ngu ikorero ry'amajuta rikaabaire riri nk'emyanya endijo ei ndagiiremu, oo, eri nk'ezambaire kandi erofahaire. Mugyenzi, nimbaasa kugamba ekintu kimwe nti, mumanyire kimwe ngu omwanya ogwo tigurofahaire. Gubaire guri omwanya ogurukukirayo obuyonjo ogu ndagiiremu, okukira munonga omu ikorero. Kandi tiinyetegyereize; naateekateeka nti, oo, obundi nibakora eraatiri igana z'amajuta ekiru kimwe. Kwonka nibakora etaani mukaaga buriizooba, kandi obwo amakorero ashatu garikukora. Naateekateeka nti, "Oo, mugyenzi, ni baahi abarya amajuta ago goona?"

Kwonka Ruhanga ahaire omugisha ogu mushaija. Nkatunga omugisha gw'okuza omu ka ye, eka nungi erikushemeza munonga, omukazi murungi orikwehayo. Kandi tihariho nshonga erikutuma bataatutura amagara ahabwa Kristo buriizooba, nk'oku barikukora. Nkabugana batabani be, kandi n'abaana barungi munonga. Nitusiima munonga ahabw'okukwatanisa oku oku twine omuntu na mugyenzi we.

Naashangire ngu omuriisa waabo w'okubanza akaba ari-ari omushaija ou naabaire nimmanya, Ow'eishe-emwe Gurley, omushaija murungi munonga ow'enyikiriza y'aba United Pentecostal, ou naabugaine emyaka echingwire, Jonesboro, Arkansas. Kandi tindamanyire ngu bakaba bari . . . ogwo akaba ari omuriisa we, n'obu kiraabe.

9 Hati mwijukye zaasaaviisi z'omwebazyo ogu. Reero, Mukama ku araakunde, Sande erikwija twine amatsiko kugaruka kubuurira. Reero nintekateeka ngu Sande erikukurataho obwo nintekwa kuza Chicago. N'ahabw'ekyo ninza kugyenda ahabw'akaire kakye, nshemereire kugarurayo ab'eka yangye omu ka, kubagarurayo, nari kubagarura Arizona kugira ngu bo, abaana, babaase kugaruka omu ishomero. Reero turekye kuteganisa omuriisa, kutwara zaasaaviisi ze.

Mbwenu, n'ahabw'ekyo nitusiima munonga Ow'eishe-emwe Neville ahabw'obufura bwe, nimumanya, bw'obw'okundaarika. Kandi nikwo ari, ta . . . Ninkunda, ow'eishe-emwe, omuntu ori nk'ogwo, otaine buryarya, otarikweyendeza, n'Obukristaayo bw'amazima bwonka. Ekyo ninkikunda.

10 Hati twaza kushoma Ebyahandiikirwe bimwe reero tubigambe. Kandi tindikumanya ni bwire ki obu turaije kuburugamu, Obutumwa obu buraingwa, kwonka niteekateeka . . . Mbaire ningamba ekiru kiri aha kugamba omwanya muraingwa, reero omuntu yaagira ati, "Mpaho, hati, ku-ku oraagambe edakiika nkye; kandi orikugambira nk'omu nfumu, omu muringo gwona," yaagira ati, "ti-titukaabaasa kwetegyereza na kakye." Yaagira ati, "Gumizamu noogamba, kandi bwanyima y'akaanya kakye nikyetegyerezibwa," nikwo agizire. N'ahabw'ekyo obundi Mukama naayenda ngu tukikore omu muringo ogwo.

Ka tugarukye twinikye emitwe yaitu.

11 Mukama, Ekigambo Kyawe kiri aha kituuti kibiikwire, kandi nitumanya ngu ekiru kimwe Kiryashwekwa obwire Bwakyo bw'aha muheru, obwo Ekigambo kiryaba omuntu. N'ahabw'ekyo nitu-nitusiima ahabw'obwire obu akasheeshe aka. Mbwenu tushuuruire, okurabira omu Mwoyo Orikwera Waawe, ebiri omu Kigambo eki eki twaza kushoma. Ninshaba ngu Omwoyo Orikwera atwegyese eriizooba ebintu ebi tushemereire kumanya. Kandi naitwe obwo, n'okusii, tuhurikize buri Kigambo tutaireho omutima, Tukipime kurungi munonga. Reero kandi k'abo abahurikiize aha rutambi rw'amaraka, bahurikize bafiireyo. Kandi ka tubaase kukyenga eki Omwoyo Orikwera arikugyezaho kutushuuruurira. Ahabw'okuba nitumanya ngu, ku Araatushukyeho amajuta, obwo okushukwaho okwo nikuba kutari kwa busha. N'okw'ekigyendererwa, kugira ngu kukore omurimo gw'okureeta oburungi, ahari Mukama. Kandi k'emitima yaitu n'okwetegyereza kwaitu kwigukye, Mukama.

Ka tugire obugabe bw'okugamba, n'obugabe bw'okuhurira, n'okuhika aha kwikiriza, kwikiriza ebi tuhuriire,

byaba nibiruga omu Kigambo kya Ruhanga; kugira ngu bibaase kutuha, Amagara Agatahwaho, aha Kiro kikuru ekirikwija. Tuhe omugisha eriizooba. Otushinje twaba tushobize. Ka tumanye enshobe ezi twine. Kandi otuhe omugisha omu muhanda oguhikire, kugira ngu tumanye omuhanda gw'okutooramu, kandi n'oku tushemereire kutwaza omuri egi nsi y'eriigyenda; kugira ngu tubaase kureeta ekitiinisa, ahari Yesu Kristo, hanu omu magara gaitu, Owaafiire kutuha Amagara omu biro bikuru bya bwanyima. Ebi nitubishaba omu Iziina rya Yesu. Amiina.

12 Hati niinyenda kushoma omu myanya ebiri omu Byahandiikirwe, akasheeshe aka. Kandi gumwe nigushangwa omu Kitabo ky'Okuruga. Buzima, yombi eri omu Kitabo ky'Okuruga. Gumwe, n'eshuura ya 13, n'omushororongo gwa 21 n'ogwa 22. Reero ogurikukurataho n'eshuura ya 14, omushororongo gwa 10, 11 n'ogwa 12. Hati naaza kushoma omu kitabo ky'Okuruga 13:21.

MUKAMA akaba abeebembera nyomushana, ari omu nyomyo y'ekicu, ngu abahabure, kandi nyekiro . . . omu nyomyo y'omuriro, ngu abamurikire, babone kugyenda nyomushana na nyekiro.

Egyo nyomyo y'ekicu nyomushana, kandi ey'omuriro nyekiro, ekaba etabaruga mumaisho.

Hati omu kitabo ky'Okuruga 14, n'omushororongo gwa 10.

Faraho ku yaahikire haihi, Abaisraeli baanaga amaisho, baareeba Abanyamisri nibaija babakuratiire, batiina munonga; baatakira MUKAMA.

Reero baagambira . . . Musa, Ahabw'okuba kuri . . . (munsaasire)

Baagambira Musa bati: Beitu shi, ebituuro bikaba bibuzire omuri Misri, waaza kutureeta kugwa omu ihamba? Eki okatukorera ki, okutwiha omuri Misri?

Eki tikyo twakugambiire, obu twabaire tukiri Misri tuti: Fa oktureka, tugume tukorere Abanyamisri? Haakiri tukorera Abanyamisri okukira okugwa omu ihamba.

Naaza kushoma endijo mishororongo mikye.

Musa yaagambira abantu ati: Mutatiina . . .

Hati muhurikize mutaireho omutima hanu.

. . . Musa yaagambira abantu ati: Mutatiina, mwemerere muhamire, haza mureebe okujunwa oku Mukama araabaretere . . . eriizooba; ahakuba Abanyamisri abu murikureeba eriizooba, timurigaruka kubareeba bundi.

Mukama niwe araabarwanirire; ekyanyu n'okwemerera kwonka.

. . . Mukama yaagira Musa ati: Ahabw'enki n'ontakira? Gambira Abaisraeli bagumizemu bagyende.

Naiwe oyereeze enkoni yaawe, ogorore omukono gwawe aha nyanja, ogibaganise, Abaisraeli barabe ahagati y'enyanja aha itaka ryomire.

Naanye niinyija kugangaaza emitima y'Abanyamisri, bazemu babakurate, nyetungire ekitiinisa ahari Faraho n'aha ihe rye ryona n'aha bigaari bye n'aha bantu be ab'aha mbaraasi.

Kandi Abanyamisri nibaija kumanya ku ndi MUKAMA, ku ndaaheze kwetungira ekitiinisa ahari Faraho n'ebigaari bye n'aha bantu be ab'aha mbaraasi.

Byanyima maraika wa Ruhanga, owaabaire ayebembera eihe ry'Abaisraeli, yaarugayo, yaabaza enyima; n'enymyoy y'ekicu yaabaruga . . . omumaisho, yaabeemerera enyima,

Yaaza ahagati y'eihe ry'Abanyamisri n'ery'Abaisraeli. . . . aha rubaju rwa bari egyo nyomyo yaaba ekicu n'omwirima, kwonka aha rubaju rwa banu yaabamurikira nyekiro; n'ahabw'ekyo bari tibaabaasa kuhika banu ekkyo kiro kyona.

Bwanyima Musa yaagorora omukono gwe aha nyanja; MUKAMA yaareeta omuyaga mwinci ogw'oburugwizooba ekkyo kiro kyona, gwagarura enyanja enyima, amaizi gaabaganisibwamu habiri, ahagati yaayo haaba eitaka ryomire.

Abaisraeli baaza ahagati y'enyanja aha itaka ryomire, amaizi gaaba nk'ekisiika aha rubaju rwabo orwa buryo n'orwa bumosho.

Abanyamisri baabakurata; embaraasi za Faraho zoona n'ebigaari bye n'abantu be ab'aha mbaraasi baaza ahagati y'enyanja babakuratiire.

Omni itumbi ahu abarinzi abarikuhitsya omu kasheeshe batandikira, MUKAMA yaayema omu nyomyo y'omuriro . . . n'ekicu, yaareeba eihe ry'Abanyamisri, yaabahahaaza emitima.

Yaashayisa enziga z'ebigaari byabo, byarema eikurura; Abanyamisri nikwo kugira bati: Murekye tuhungye Abaisraeli; ahabw'okuba MUKAMA niwe arikubarwanira n'Abanyamisri.

13 Ekigambo kya Mukama ni kikuru munonga, ni kirungi munonga, tihariho muringo gwona gw'okureka Kukishoma. Nikihinduka Amagara, twaba Nitukishoma. Nintekateeka, omu ishomo eri akasheeshe aka, n'obu riraabe nirikwatwa aha rutambi rw'amaraka, niinyenda kugamba eki omu kutandika, nikireebeka, niinyeshanga. Kandi enshonga erikutuma na . . . Nyomwabazyo, ku mbaire ninshoma, kandi naatunga ishomo eri, reero naateekateeka nti, "Naaza kugamba ahari eri, Mukama ku araasiime, ahabw'okuba niringarura ahansi." Kandi nyine amatsiko ngu twena niritugarura ahansi, kugira ngu tubaase kureeba, kandi ritume twareeba ahaiguru; n'okushoma kakyeho, omu kugyeragyeanisa obwire obwo, e . . . n'obwire obu hati.

14 Niinyenda kukwata ebigambo bishatu ahabw'eishomo, kandi nibyo ebi: Ahabw'enki Nootaka? Gamba! Ruhanga akagambira Musa, hanu omu mushororongo gwa 15 ati, "Ahabw'enki Nontakira? Gambira abantu, bagumizemu bagyende." N'ahabw'ekyo: Ahabw'enki Nootaka? Gamba!

Hati, twine eishomo buzima, kandi naaza kugyezaho kurahutya kurirabamu juba nk'oku kirikubaasika, nk'oku Omwoyo Orirkwera araayebembere. Kandi niinyenda kuteekateeka aha . . . aha ishomo eri, rya Musa arikutakira Ruhanga, omu bwire bw'akabi; kwonka Ruhanga arikugarukamu Musa naamukabukira, omu-omu bwire bwonyini obu akabi kaabaire kariho. Kandi n'eky'obuhangwa, nikwo kirikureebeka, omuntu kutaka. Beitu kandi ka n'o-okukabukirwa Ruhanga okuhinduka kandi akamukabukira ahabw'okukigamba, ahabw'Okumutakira. Nikireebeka nk'ekintu ekigumire.

15 Emirundi mingi ku tureeba Ebyahandiikirwe, omu muringo gwaitu gw'okureeba, nikireebeka kigumire munonga. Kwonka ku Tubishoma akaanya kakye, tushanga ngu Ruhanga ow'obwengye bwona naamanya eki Arikukora. Kandi naamanya oku akora ebintu ebi kandi n'oku akoragana n'omuntu. Naamanya ekiri omu muntu. We, Naamumanya. Titurikumanya. Nitumanya n'obwengye bw'obuntu bwonka. Buzima Naamanya ekiri omu muntu.

Musa akazaarwa omu nsi egi, kandi ari omwojo oine ekiconco. Akazaarwa ari nabi, omucunguzi. Akazaarwa aine ebirikwetengwa omuriwe omu kuzaarwa, nk'oku buri muntu oija omu nsi azaarwa aine ebirikwetengwa ebi, nk'oku buzima ndikwikiririza omuri-omuri Ruhanga omanya ira ebintu bitakabaireho, okutooranwa ira tutakabaireho.

16 "Ti kugira ngu Ruhanga naayenda omuntu weena kuhwerekyerera, kureka naayenda ngu boona bahikye aha kweteisa." Kwonka, ahabw'okuba Ruhanga, Akaba naateekwa kumanya, kandi naamanya, "naamanya omuheru kuruga aha kutandika." Mwareeba? Ku Araabe atarikugumanya, obwo Aine obugarukiro; kandi ku Araabe aine obugarukiro, Tari Ruhanga. N'ahabw'ekyo Akaba atarikwenda, buzima, ngu omuntu weena ahwerekyerera, kwonka We-We akamanya owaabaire naaza kuhwerekyerera hamwe n'owaabaire atarikuza kuhwerekyerera. Egyo niyo nshonga, ekigyendererwa kyonyini ekyatumire Yesu yaija omu nsi, kikaba kiri okujuna abo abu Ruhanga, okurabira omu kumanya Kwe ebitakabaireho, yaareebire barikwenda kujunwa, mwareeba, ahabw'okuba ensi yoona ekaba esingirwe orubanja. Kandi tindikureeba oku twakubaasa kukyegyesa omu muringo ogundi gwona gutari okumanya ebitakabaireho kwa Ruhanga, kandi Baiburi neegamba butunu ngu We "naamanya omuheru kuruga aha kutandika," kandi naabaasa kugugamba.

N'ahabw'ekyo, abantu ku-ku bagyezaho kuba ekintu eki batari, baba nibatooreza kwonka, kandi hataraho kubanganisa eki ori kiriyashuururuwa. Ebibi byawe nibyoreka eki ori. Torikubaasa kubishweka. Hariho eky'okushweka ebibi kimwe kyonka, egyo n'Eshagama ya Yesu Kristo, kandi Terikubaasa kuteebwaho shana Ruhanga Yaaba yaakwetsire kuruga aha kuhangwa kw'ensi. Ekyo nikyo egyo Shagama yaasheeshekyeire; kutari kuribatiirirwa, n'okuzaanisibwa, n'o-n'okuha emirimo, kandi n'o-n'okujumwa, n'e-n'ebindi. Ekaba eri ey'ekigyendererwa nanka kyonyini. Ekyo kihikire. Kutari okugizaanisa, kutari okugitooreza, omu kugira ngu ebibi bishwekirwe kunu bitashwekirwe. Kandi tihariho omuntu n'omwe ou ebibi bye birikubaasa kushwekwia shana eiziina rye ryaba ryateirwe omu Kitabo ky'Omwna gw'Entaama ky'Amagara ensi etakahangirwe. Yesu We wenka, akagira ati, "Tihariho orikubaasa kwija Ahariinye Tata yaaba atamwiriiize haihi. Kandi abu Tata Yampaire," obunaku obwahingwire, "Yampaire boona, baryaija Ahariinye." Nikwo kiri. N'ahabw'ekyo toribaasa kutuma Ebigambo ebyo byabeiha. Biriho ahabw'Amazima n'ahabw'okuhabura.

17 Kandi Musa akazaarwa aine ekiconco ky'okwikiriza; Musa akaba aine okwikiriza kw'amaani. Nitukureeba, nikwevoreka omuriwe, bwanyima y'akaire kakye. Kandi akazaarirwa omu ka y'amaani, nk'oku turikumanya oku ngu ishe na nyina, kandi bakaba nibaruga omu ruganda rw'Abaleevi. Nikyo, ekitebyo hanu, ekirikubandiza ebi, omu Kitabo ky'o-ky'Okuruga, kirikuha kurungi munonga eby'amagara g'omushaija ogu rugambwa. Kandi akaba ari omwe aha-aha bantu rugambwa abarikukirayo b'omuri Baiburi, ahakuba akaba ari ekirikushushanisa buzima kya Mukama Yesu.

Akazaarwa okuzaarwa kw'omutaano munonga, nka Mukama Yesu. Akazaarwa omu bwire bw'okuhiigwa, nka Mukama Yesu. Akazaarwa kuba omucunguzi, nka Mukama Yesu. Yaasherekwa abazaire be, baamushereka omuzigu, nka Mukama Yesu. Kandi akahika omu bwire bwe bw'okuheereza, nka Mukama Yesu. Akaba ari omwebembezi, nka Mukama Yesu. Akaba ari nabi, nka Mukama Yesu. Kandi akaba ari omuhi w'ebiragiyo, nka Mukama Yesu.

Kandi nitushanga ngu akafeera aha Rukiri, kandi naateekwa kuba yaagarukire akazooka n'ebindi byona, ahabw'okuba, bwanyima y'emyaka magana munaana akaba ayemereire aha Rushozi rw'Okuhindurirwaho,

naagamba na Mukama Yesu. Mwareeba? Baamaraika bakamutwara. Tihariho n'omwe orikumanya ahu yaaziikirwe. Ekyo na sitaane tarakimanyire. Buzima, tindikwikiriza ngu akaziikwa. Ni-niinyikiriza ngu Ruhanga akamutwara, kandi-kandi yaafeera aha Rukiri oru yaakuratsire ebiro by'amagara ge goona.

Kandi akaba ari ekirikushushanisa kya Kristo ekihikire. Akaba ari omugabe omu bantu. Akaba ari omuhi w'ebiragiro. Akaba ari-akaba ari-orkubaisaho abantu. Akaba ari buri kintu, omu-omu kushushaniriza, eki Kristo yaabaire ari.

18 Hati, mbwenu, nitureeba ngu akazaarwa aine ebiconco bikuru ebi n'engyesho omuriiwe, n'ahabw'ekyo kikeetaagisa Ekintu nanka kyonka kukimurikira, kutuma ekintu ekyo kyaba Ekihuriire.

Mwareeba, embibo ya Ruhanga buzima neetuteebwamu okuruga aha kuhangwa kw'ensi. Kandi Omushana ogwo ku gurikubanza kujwera egyo mbibo, Gugiha Amagara, kwonka Omushana niguteekwa kubanza gwajwera egyo mbibo.

Nk'oku nyegyeise emirundi mingi aha mukazi mukye w'aha iziba, we ari omu mbeera egyo. N'obu yaabaire ari omuntu o-orkuhemura, n'obu a-amagara ge gaabaire nigagaywa, kandi akaba ari omuri egypto mbeera ahawb'okuba emigyezo ekaba etakamukwatahoga na kakye, kwonka, n'obu kiraabe, Omushana ogwo ku gwamujwereire omurundi gw'okubanza, jubajuba Akagwetegyereza, 'habw'okuba hakaba harimu ekintu ky'Okugwakiira. "Okuzimu ku kwetana n'Okuzimu," nihateekwa kubaho Okuzimu ahantu nanka kwetaba okweta okwo.

Mbwenu Musa hanu akazaarwa ari nabi ogu, kwonka yaakurira omu ishomero ry'ebi'obwegyese bw'obuntu n'omu kikaari kya Faraho. Faraho Seti, owaamukurize, akaba ari omushaija owaabaire akiine ekitiinisa, kandi naikiriza Yosefu kuba nabi wa Mukama. Kwonka bwanyima ya Seti hakaija Ramaseesi, kandi Ramaseesi akaba atarikufa ahari Yosefu. Mbwenu, n'ahabw'ekyo, aho niho akabi kaatandikiire, hati, obu heemekwa Faraho owaabaire atarikumanya Yosefu.

Kwonka ebintu bikuru ebi, ka tubigambeho akaanya kakye konka, obwo, tutakahikire aha kicweka kikuru ky'eishomo. Nyine omuringo gw'omutaano gw'okutandika eishomo, bwanyima nkarihangusya, mbwenu Mukama atuhwere akasheeshe aka twaba niturihangusya.

19 Musa, akazaarwa n'ekiconco kikuru eki ky'okwikiriza. Bwanyima, yaashukwaho amajuta kandi yaatumwa ari aha rushaka orurikwaka, kucungura abantu ba Ruhanga. Hati, mureebe oku omushaija ogu yaabaire aine ebintu bikuru bingi! Akazaarwa ahawb'ekintu nanka. Ruhanga akaba aine ekigyenderwa omu kuzaarwa kwe.

Okuba hanu kwawe Ruhanga akwiniire ekigyendererwa. Waareeba? Kuri noobaasa kwonka kuba, kuhika aha mwanya ogwo, ka n'akabi kaingi aku waakujuna Ruhanga naiwe, wenka.

Musa akazaarwa, reero yaaba, bwanyima, yaahika aha-aha mwanya ogu yaashukiirweho amajuta. Kandi, yetegyereze, embibo erambiire omwo eine okwetegyereza kw'obwengye bw'obuntu, n'okwikiriza kwona oku yaabaire azairwe nakwo kucungura abantu aba, beitu nabwo teragizire Amagara okuhitsya obu ogwo Mushana kuruga omu rushaka orurikwaka gwagijwereire; okuhitsya obu yaareebire, kitari ekintu eki yaashomireho, kureka ekintu eki yaareebire n'amaisho ge; Ekintu ekyagambire nawe, kandi Akakigarukamu. Oo, ekyo ka kyatumire ebintu byaba Ebihuriire.

20 Nintekateeka ngu omushaija weena oine e . . . nari omukazi, omwojo nari omwishiki. Kandi nintekateeka, omu kwetegyereza kw'obwengye bw'obuntu kw'ebi bateekateeka ngu Ekigambo nikwo kiri, n'ebindi, tibakaabaasa kugira omusingye oguhamiire kimwe na kakye okuhitsya obu baraabugane ogwo Mushana ogurikutuma ekyo Kigambo kyaba ekihuriire.

Nintekateeka nti tihariho ekanisa omu bikorwa byayo, n'obu yaakuba ey'obwengye eta kandi erikuramatira aha nyikiriza z'ediini oku erikubaasa, egypto kanisa terikubaasa kuba gye okuhitsya obu Ekirengire eby'Obuhangwa kiraayorekwe omu bantu abo, kandi bakakireeba. Ekintu eki barikubaasa kugambira, kikabagarukamu, kikahamya Ekigambo eki ekihandiikirwe.

21 Hati mwijukye, Musa ku yaabugaine orushaka oru orurikwaka omuriro, ekyo Kigambo kikahamibwa buzima. Kikaba kiri Ekigambo. Kikaba kitarikwetaagisa Musa kwemereza omutima ati, "Eiraka eri nirimanyisa ki? Ekintu eki hanu niki?" Ahabw'okuba, Ruhanga akaba yaahandiikire omu Byahandiikirwe, omu kitabo ky'Okutandika, ngu, "Abantu baawe baryashuhuukira omu nsi egi etari yaabo, kwonka baryaihwayo bwanyima y'emyaka magana ana, bagarukye omu nsi egi omurundi ogundi, ahawb'okuba e-ebibi by'Abaamori tibikakanyire kurengyesereza." Hati, emyaka amagana n'amagana enyima, Ruhanga akaba yaagambire ngu, "Israeli eryashuhuuka kandi eitwe kubi omu nsi etari yaayo, kandi egumeyo kumara emyaka magana ana. Kwonka Ruhanga, n'omukono gw'amaani, akaba naaza kubaihayo." N'ahabwekyo, nimureeba, n'orushaka oru orurikwaka . . .

Musa eki akaba naakimanya, omu buryo bw'obwengye bw'obuntu. Kandi embibo eyaamuzaarirwemu, ekaba eri omu mutima gwe. Kandi akagyezaho, kurabira omu bumanyi bw'obwengye bwe n'Ekigambo, kugyezaho ku-kubaihayo, kubacungura, ahawb'okuba akaba naamanya ngu akazaarwa ahawb'ekigyendererwa ekyo. Ekyo akaba naakimanya, obwo bwire. Ebyahandiikirwe byona bikaba nibigira ngu bakaba bamazireyo emyaka magana ana.

Nk'oku turikumanya hati, nk'oku omushaija yaaheza kumbuuza akaire kakye akaahingura, aha Kwija hamwe n'Okutwarwa. Nitumanya. Obwire bw'okutuuraho bwaitu buhweireyo, obwire bw'Okutwarwa bwiriire haihi, mbwenu nitusherura okwikiriza kw'okutwarwa okurikubaasa kuteeranira hamwe Ekanisa reero kukagiha amaani agarengire eby'obuhangwa, agarikubaasa kuhindura emibiri egi ei turikutuuramu. Nitureeba Ruhanga ogwo orikubaasa kuzoora omuntu ofiire akamwimutsya ahansi nari aheeru omu mbuga, kandi akagaruka akamuhindura ohuriire ogundi murundi kandi akamureeta omu maisho gaitu, ku turikureeba Ruhanga ogwo orikubaasa kukiza ekookoro eriire omuntu akaba nk'ekicuucu kandi akamwimutsya akaba omuntu oine amaani ori gye omu mubiri, ekyo kishemereire kuha abantu okwikiriza kw'okutwarwa. Kugira ngu, ogwo Mushana gwarabya niguruga omu mwanya ahaiguru, n'enzamba ekagamba, Omubiri gwa Kristo guryateeranira hamwe jubajuba, kandi guhindurwe omu kaanya kakye reero gutwarwe omu Kaabunga. Eego, nihateekwa kubaho ekintu nk'ekyo ekyabaho. Kandi amashomero gaitu g'ebi'ediini tigarikubaasa kureeta ekyo na kakye, kandi obwo omu buryo bw'obwengye ni marungi. Kwonka nooteekwa kubugana Omushana ogwo! Nooteekwa kusherura Ekintu ekyo.

22 Kandi hanu Musa, naayegamiza okwetwa kwe kukuru aha Kigambo, kandi kukaba kuri kukuru, okuhitsya obu ekiro kimwe yaabugaine Omushana ogu, kandi Ekigambo Kyonyini kikamugarukamu. Reero yaashukwaho amajuta. Ekyo kikashuka majuta aha kyabaire kiri omuriwe, ekyo ekiri omuriwe, o-obwengye obwakiiriize, okwikiriza okwabaire kuhamiire aha nyikiriza ye omuri Ruhanga, owaamutooraine akiri omunda ya nyina. Kandi hati ku yaahikire omu Kubaho kw'Omushana ogu, Gwashuka amajuta ahari ekyo eki yaabaire naikiriza. Mwareeba? Ka n'okushukwaho! Kandi yaatumwa.

Hati, nitumanya, omu buryo bw'obwengye bw'obuntu akaba yaahuriire nyina. Akaba naamanya ekyabaire nikiza kubaho, kandi akaba naamanya ngu atwire omu bwire obwo. Kwonka hanu akashanga ngu akaba aremirwe, n'ahabw'ekyo naabaasa kuba . . . okwikiriza kwe nikubaasa kuba kwahweire amaani kakyeho. Kwonka ku yaahikire aha rushaka, Ruhanga yaagira ati, "Mpuriire okutaka kw'abantu Bangye, kandi Naijuka okuraganisa Kwangye ahari baishenkurubo, Abrahamu, Isaaka, na Yakobo, mbwenu Naashuma naija." "Nyowe," aho, na-naayegambaho, "Naashuma kubajuna."

23 Kandi hati, mbwenu ka nyongyeraho eki ku kiraabe ki . . . Ruhanga ansaasire ku kiraabe nikihurirwa nk'okurogota. "Tinkora murimo omu nsi ntarabiire omu muntu. Ni-Ni-Niinye Muzaabibu; naimwe muri amataagi. Kandi Niinyemanyisa kwonka Naabaasa kubona omuntu. Kandi Niinye Naakutooraine, mbwenu Naakutuma eifo kubaihayo." Mwareeba? Hati mwetegyereze, "Ndyaba ndi hamwe n'akanwa kaawe, kandi Ni . . . twara enkoni egi."

Reero Musa yaagira ati, "Noobaasa kuunyoreka akamanyiso ku Nooza kuntuma, kandi ku Wanshukaho amajuta, kandi ku Nooza kukora ebintu ebi?

Yaagira ati, "Ekyo eki oine omu ngaro niki?"

Onu ati, "N'enkon."

Ruhanga yaamugira ati, "Ginagye ahansi." Enkoni yaahinduka enjoka. Musa yaaghinga.

Mukama yaamugira ati, "Gikwate." Yaagaruka yaahinduka enjoka. Yaagira ati, "Ta omukono gwawe omu kifuba." Ku yaagwihiremu, yaashanga gubembire. Yaagugaruramu, gwakira.

24 Musa akagira ngu, "Akareeba ekitiinisa kya Ruhanga." Tiharagarukire kubaho ebindi bibuuzzo, ahari Musa. Oreetegyereize, ku ataragarukire kwirukira omu ihamba? Akamanya ku yaabaire ashukirweho amajuta. Akaba naamanya ahu, ebintu ebi byona ebyabaire biri omu mutima gwe, ebi bintu bikuru birungi, kandi akaba . . . hati bikaba bishukirweho. We, ayeteekateekire. Ayeteekateekire kugyenda. N'ahabw'ekyo yaashuma naatoora ogurikuza Misri.

Ruhanga akaba yaagizire ati, "Ndyaba ndi hamwe naiwe," n'ahabw'ekyo ekyo-ekyo nikimara. Yaaba, "Ndyaba Ndi hamwe naiwe," nikyo kyonka eki Musa yaabaire naateekwa kumanya, ahabw'okwetwa kukuru oku omu mutima gwe. Mbwenu hati Ruhanga yaagira ati, "Ndyaba Ndi hamwe naiwe."

Hati, Ruhanga nawe akaba yaahamize, ebi Musa yaabaire naagamba. Musa akaba naagira ngu, "Mbugaine Mukama. Kandi Yangira ngu mbagambire ngu, 'MBAHO' niwe yantuma." Mwareeba?

Hati baagira bati, "Hanu hariho omushaija, Omuyudaaya ondijio, obundi bamwe ahari aba abarikurengyesereza omu kwikiriza abatwire nibaija obwire bwona n'oburyarya bw'emiringo yoona bw'okutwiha omu bukwatwa." Kandi noomanya oku abantu barikuba bari baaba bari abahuuku, nari omu bukwatwa ahabw'ekintu nanka, burijo habaho orikukora akakoryo nanka orikubaizira aho, nimumanya, kukikora.

N'ahabw'ekyo, Musa, Ruhanga akaragaanisa Musa ati, "Ndyaba Ndi hamwe naiwe. Ndyaba Ndi omuriwe. Ebigambo Byangye biryaba Ebigambo byawe. Iwe gamba Ebigambo Byangye kandi ogambe ebi Ndaagambe."

25 Kandi hati Musa ku yaashuumireyo kandi akabagambira okwetwa oku, kandi akeemerera omu maisho ga Faraho, kandi akamugambira ati, "Mukama Ruhanga w'Abaheburaayo agizire ngu, "Ihayo abo bantu." Kwonka tarabarekwire ngu bagyende. N'ahabw'ekyo ya-yaakora akamanyiso omu maisho g'abakuru n'omu maisho ga Faraho, kandi n'obumanyiso obu Ruhanga yaakozire. Yaagira ati, "Hati, nyencakare, nk'aga magingo, eizooba

niriza kuraara. Omwirima niguza kushweka Misri yoona, "kandi buzima kyabakwo. Reero yaagira ati, "Nihazan-nihaza kwija eshohera omu-omu ihanga," reero yaimutsya enkoni ye ahaiguru kandi yaayeta eshohera, kandi eshohera zaija. Kandi yaaragura, kandi buri kintu eki yaaragwire kikabaho buzima nk'oku yaakiragwire. Akaba ari Ruhanga. Mwareeba?

26 Ruhanga akamweta okuruga aha kuzaarwe kwe, yaamutamu ebantu bikuru, by'okwikiriza kw'amaani, reero yaashuma n'Okubaho Kwe kandi yaashuka amajuta ahari ekyo kintu kikuru ekimurimu, kandi yaamutuma eifo n'Ekigambo Kye, kandi yaahamibwa gye ebi yaabaire naagamba. N'obu haimukire abanyabishuba abarikwingana ki, n'ebantu bingi ebi ebindi ebyabaireho, Ruhanga akaba naagamba aha . . . Musaakoorekwa. Musa, eki Musa yaabaire agamba, Ruhanga akaba akihiikiiriza. Niinyenda ngu ekyo Kigambo mutarikyebwa. Eki Musa yaabaire agamba, Ruhanga akaba akihiikiiriza, ahabw'okuba Ekigambo kya Ruhanga kikaba kiri omuri Musa. "Ndyaba Ndi hamwe n'akanwa kaawe; kagambe ebantu ebihikire." Hati, eki Ruhanga arikugamba-eki Ruhanga arikugamba, Naakigamba kurabira omuri Musa, kandi kikahamya kandi kyashagika ebi yaabaire naagamba.

27 Nabwo, nyina akamugambira, eby'okuzaarwa kwe okutari kw'obutoosha, kandi n'oku obwire bwabaire bwiriire haihi n'eshaaha obu haabaire nihaza kubaho okucungurwa. Amuraamu na-na Yokebedi, mutabani na muhara wa Levi, baatandika kushaba Ruhanga ngu ayohereze omucunguzi. Kandi nikitwara . . . waareeba obwire bw'okuraganisa nibwirira haihi, nikita abantu omu kushaba n'okugira enjara. Kandi tihariho kubanganisa ngu-ngu Yokebedi, nyina, akaba yaamugambiire emirundi mingi; nk'oku yaabaire ari omwegyesa we, nabwo, nk'oku turikumanya ebyafaayo. Kandi akaba amugambiire oku yaabaire ashabire. "Kandi, Musa, obu waazaarwa, mutabani, okaba ori omwana murungi. Okaba ori ow'omutaano. Hariho ekintu ekyabaireho aha kuzaarwa kwawe."

Nkakishobooreraho abaana omu buryo bw'omuzaano, enshumi nkye ehangwire, kandi naagira nti, "Amuraamu ku yaabaire ari omu kishengye naashaba, yaareeba Maraika naasyorayo rurara Ye kandi yaagyorekyereza Obukiizi-bwa-bumosh, reero yaagira ati, 'Noja kuzaara omwana, kandi naija kutwara abaana Bukiizi-bwa-bumosh omu nsi eyaaraganisiibwe.'" Nkakishobooreraho abaana bato omu buryo bw'omuzaano kugira ngu bakyetegyereze; ahakuba obwengye bwabo tibukahikire aha bwanyi imwe abakuru, kandi nimubaasa kukyenga ebantu nk'oku Omwoyo Orikwera arikubibashuururira.

28 Hati, n'obu nyina araabe yaamugambiire ebantu ebi, kandi arikubimanya, beitu nabwo akaba naayetenga okundi kukwatwaho. O-okwegyesibwa kukaba kuri kurungi, kwonka akaba naayetenga okucumitwa omu mutima we wenka.

Ekyo nikyo ensi erikwetenga ebiro ebi. Ekyo nikyo ekanisa erikwetenga ebiro ebi. Ekyo nikyo buri omwe arikwetenga ebiro ebi, batabani na bahara ba Ruhanga. Kugira ngu obe otyo, nooyetenga kucumitwa omu mutima iwe wenka, waareeba, Ekintu nanka. N'obu kyakuba, noomanya ngu Ekigambo n'amazima, noomanya ngu Kihikire; kwonka kandi ku kirikukucumita omu mutima, haza okareeba ekintu kyakorwa, obwo noomanya ngu ori omu muhanda oguhikire. Waareeba? Kandi, reeba, obutoosha nikija kuguma kiri eky'Ebyahandiikirwe. Nikija kuguma kishorongire n'Ebyahandiikirwe, 'habw'okuba eki kikakikora.

Okushaba kwa Amuraamu kukaba kushorongire n'Ebyahandiikirwe buzima. Okushaba kwabo kukaba kushorongire n'Ekigambo ekyaraganisiibwe. Ruhanga akaraganisa kukikora omu bwire obwo. Bakakishaba, mbwenu ngugu hanu omwana murungi yaazaarwa. Kandi baka . . .

29 Mureebe! Oo, eki ka ninkikunda! Mwareeba, omu bwire obu Faraho yaabaire naitiramu abaana boona, mwareeba, na-naabaitisa rurara, rurara y'omurinzi, bo, bakaba bacumita abaana bato aba babaita, babagaburira zaagonya, emitumbi y'abaana bato, okuhitsya obu zaagonya obundi zaagomokire ahabw'emitumbi y'abaana b'Abaheburaayo. Kwonka Baiburi neegira, ngu, "Abazaire be tibaratiinire kiragiyo kya Faraho ky'okwita abaana." Tibaratiinire. Tibaragizire bwoba, ahabw'okuba bakareeba ekintu omuri ogu mwana, eky'okubanza kya byona. Bakakireeba, ngu oku kukaba kuri okugarukwamu kw'eshaara.

Kandi hati Musa akaba aine ebi byona nk'omusingye, n'ahabw'ekyo Musa akaba naamanya ngu akatumwa ahabw'ekigyendererwa ekyo kyonyini ky'okucungura Abasraeli.

Mwereebe, obumanyi bwona nibweyongyera. Waatunga ekintu kyona, haza orikubaasa kureeta Baiburi, okagira otu, "Eki nikiza kubaho," kandi kikabaho; "kandi eki nikiza kubaho obwire nanka," reero kikabaho; "kandi eki nikiza kubaho obwire nanka obwo," kikabaho; obwo ebyo byona nibikanya reero bitworeka ekishushani.

30 Oo, ekanisa egi akasheeshe aka, itwe abantu b'obwire obu, Ow'eishe-emwe Neville, twaba nitureeba enju nizitaahirira eishokyeyaitu, amabega gaitu nigabendabenda, twaba nitureeba ensi neezongazonga kandi neetengyeta nk'oku eri, ka nitubaasa kumagamaga haza tukareeba ngu okuragaanisibwa kwiriire haihi! Ni, ni . . . Nintekateeka, emirundi mingi, omuntu kuri naabaasa kugyenda n'amaani Akakigurukiramu ahonaaho, haza Atarikuyetegyereza, nari Arikuyetegyereza, nimmanyisa, reero Akakitaahamu ahonaaho, haihi kikaakutwara omu Butahwaho, n'okutwarwa nk'okwo! Kandi otakamanya na kakye, kwonka, oo, orabe omu bintu ebi tureebire kandi tukamanya kandi tukeetegyereza, reero byona bitaahemu omurundi gumwe. Omushaija, nari omukazi, omwojo, nari omuhara, nibabaasa obundi kwimutsya emikono yaabo kandi bagire bat, "Ka tuyende, Mukama Yesu," nimureeba. Oo, obwire ka bwiriire haihi munonga!

31 Musa ahabw'okumanya ngu akazaarwa ahabw'ekigyendererwa ekyo, akarangiza omu dirisa kandi yaareeba abo Baheburaayo oku baabaire nibaitwa kubi; yaaranzya hanu omu Byahandiikirwe, kandi hakaba nihagira hati, "Kandi baryashuhuuka bamare emyaka magana ana, mwareeba, kwonka Ndyabaihayo n'omukono Gwangye gw'amaani." Reero ku yaagarukire, bwanyima y'okutumwa, ashukirweho amajuta, arikumanya ngu akazaarwa . . . Kandi okwikiriza kwe kwaranza, ahabw'okwikiriza akareeba abantu abo kandi yaamanya ngu bakaba bari abaana ba Ruhanga, 'habw'okuba ensi . . . E-Ekigambo nikwo kyagambire. Bakaba batari b'ensi, kandi bakaba batari nk'abandi. Bakaba bari ab'omutaano. Kandi bakaba bari abashema n'abarikurengyesereza omu kwikiriza, a-aha by'okweshemeza by'ahaiguru bya Misri; kandi akaba naaza kuba mutabani wa Faraho, kwema aha ngoma, kandi owaabaire naaza kukurataho. Kwonka, we, hariho ekyabaire kimuri omunda, o-okwikiriza kwonyini okwabaire kutarikureeba ebintu ebyo, eby'okweshemeza ebi yaabaire naaza kuhungura. Akareeba okuraganisa kwa Ruhanga, reero yaamanya ngu obwire bukaba bwiriire haihi. Kandi omushaija ogwo ka naateekwa kuba yaateekateekire!

32 Niinyenda kukigambaho nawe, ekiro kimwe, ku ndimubugana seeri. Noogira oti, "Obwo n'obushazi, ow'eishe-emwe!" Ngaaha, ti bushazi. Ninja kumubugana, ahabw'embabazi za Ruhanga. Eego, sebo. Ndyagamba nawe, ekiro kimwe, Musa we wenka. Kandi ka naakwenzire kumubuuza, oku, obwire obu yaareeba okutebeekanisa kwe!

Ka yaashobangiriirwe, sitaane arikumugambira ati, "Aaa, abantu tibarikwija kukwikiriza. Ahaa. Ekyo ni bu-busha."

33 Kwonka embibo egyo ku yaatungire Amagara eruguru okwo, ekintu kyamucumita omu mutima, reero yaamanya ngu hariho ekintu ekyabaire nikiza kubaho. Akamanya. Yaaranzya aha shaaha ye kandi yaareeba eshaaha ahu zaabaire zaahika, reero yaamanya, kandi ka naateekwa kuba yaateekateekire ku yaareebire. Hati ebi byona ku yaabitaire hamwe, ekintu kikuru eki kyona eki yaareebire; obwire bw'Ebyahandiikirwe, okushaba kwa nyina na ishe, n'oku yaazairwe okuzaarwa kw'omutaano, omwana w'omutaano. Kandi, obwire bwona, hakaba hatwiremu ekintu hare omuriwe.

Reero hati yaashobooka kandi yaagyezaho kuteekateeka ngu naaza kukozesa okutendekwa kw'ekinyamahe kw'omu ishomero rye, reero acungure abantu, kandi ekyo kyarema.

Bwanyima yaaza omu ihamba kandi yaashwera o-omwishiki murungi w'Omunyesiopia, kandi baazaara akoojo akarikwetwa Gereshomu.

Kandi ekiro kimwe ku yaabaire ariisize amatungo, ahonaaho yaareeba orushaka nirwaka aha mutwe gw'orushozi, nirwaka. Reero yainamukayo. Kandi butari bwengye, bitari-biteekateeko, kutari kuhabisa, kutari okureeba ebitariho, kureka omuriwe . . . Hakaba harimu Ruhanga wa Abrahamu, omu Mushana, Enyomyo y'Omuriro enyima omu rushaka, ogwo Muriro, nk'oku ebingonzi bigyenda, kwonka tigwayosya orwo rushaka. Reero Eiraka ry'Ebyahandiikirwe, Eiraka rya Ruhanga, ryagambilamu, kandi ryagira riti, "Naakutoorana. Niwe ogwo muntu. Nkakukuza ahabw'ekigyendererwa eki. Ninkuhamiza hanu, kurabira omu bumanyiso, nooza kushuma eifo kucungura abantu ahabw'okuba Ekigambo Kyangye nikiteekwa kuhikiirira."

Oo, Ekigambo Kye ky'obwire obu nikiteekwa kuhikiirira. Tutwire omu bwire obwo. N'obu ondijo muntu weena yaakugamba ki; Ekigambo nikiteekwa kuhikiirira. Eiguru n'ensi biryahwaho, kwonka kitari Kigambo Kye.

34 Hati, Musa ku yaataire ebi byona hamwe, kandi yaareeba embaju zonna, kikaimutsya okwikiriza kwe. Amiina! Oo, mugyenzi! Ka n'ekiteekateeko! Eki, kyo kyonka, we wenka ku yaareebire Ebyahandiikirwe bishorongire nibyorekyera kimwe eki kyabaire kiri, kandi nibigamba ahari Ruhanga, kandi n'obuhame bwakyo buri aho, kikaimutsya okwikiriza okwabaire kuri omuriwe, kutandika kukora.

Mbwenu itwe kishemereire kutukorera ki? Nitwetenga okweteisa. Nitwetenga okusisiimuka. Niinyegambaho. Mwareeba? Niinyetenga okusisiimurwa. Hariho eki ndikwenda. Naagambire ngu niinyegambaho akasheeshe aka, nimmanyisa okwegambaho. Ni-ni-niinyetenga o-okusisiimurwa.

Kandi ku ndikuteekateeka ahari ako kamanyiso kakuru, buri kintu kitairwe aho kurungi munonga, kandi kikaimutsya okwikiriza kwa Musa. Kandi, mugyenzi, akareeba hatariho ekintu kyona . . .

35 Hanu, akahunga yaaruga Misri, hamwe, buzima, akaba naabaasa kutandikaho o-orugomo nari ekindi kintu, kandi akaba naabaasa-akaba naabaasa kwimuka kandi atandikaho obweme omuri Misri, kandi akaba naabaasa kutwara eihe kandi arwana, kwonka, nimureeba, kandi akaba aine enkumi n'enkumi aha rubaju rwe. Kwonka omu mwanya gw'ekyo, akaba aine obwoba n'okukora ekyo, aine amahe aha rubaju rwe.

Kwonka hati ngugu hanu yaagaruka, ahanyima y'emyaka makumi ana, aine emyaka makumi munaana y'obukuru, aine enkoni yonka omu ngaro ze. Ahabw'enki? Ekyabaire nikyaka omu mutima gwe kikaba kyaheza kuba amazima. Obwo nibwo yaashukwaho amajuta, kandi yaamanya ngu aine OKU NIKWO MUKAMA ARIKUGIRA. Hakaba hatariho ekintu kyona ekyabaire nikiza kumuzibira hati. Akaba atarikwetenga eihe. Ruhanga akaba ari nawe. Nikyo ekyo kyonka eki yaabaire naayetenga; Ruhanga kuba hamwe nawe.

Oo, waamanya ngu Ruhanga akwohereize kukora ekintu nanka, haza okareeba ariyo kirikutoora, ti-tihariho ekintu kyona ekirikubaasa kuza omu mwanya gwakyo. Nikyo ekyo kyonka.

36 Niinyijuka obwire obu Mukama yangambiire ebintu bimwe ngu nibyenda kubaho, reero nygenda kandi mbireeba biri aho honyini, oku . . . Oo, ka nooyehurira kurungi! Byona byaherize kuza omu buteeka, nikyo ekyo kyonka, mwareeba, ahabw'okuba Ruhanga nikwo yaagambire.

Niinyijuka, baingi omuriimwe nimwijuka, eby'akoojo akaazoirwe omuri Finland, reero kaazooka omu bafu, akaabaire kaitsirwe emotoka. Kandi nkeemerera aho aha rubaju rw'oruguuto, reero naatandika kutambura ninduga aha mwana ogwo, bwanyima naahinduka naaranzya enyima. Reero ekintu kyata omukono gwakyo aha ibega ryangye, kandi naateekateeka ngu n'Ow'eishe-emwe Moore, kwonka tihariho omuntu owaabaire ari haili naanye. Kandi naaranzya enyima, reero naimutsya amaisho naareeba orushozi oru naareebire. Naagira nti, "Buzima, ndareebire akabungo ako ahantu nanka, kwonka titurarabire omuri ogu muhanda. Tukaraba omu gundi muhanda. Ako kabungo karahi?"

Kandi naaranzya reero naareeba emotoka egoy eifo aho, esiisikaire; naareeba akoojo ako aho n'o . . . karambiire aho n'e-eishokye rishazirwe enkomborora, nk'oku twakuryeta kunu. Amaisho gagarukire enyima, nk'oku ag'Ow'eishe-emwe Way gaabaire gari ekiro kiri obu yaagwa. Kandi akagyere kamwe karabire omuri sokisi, ahu akaguru ke kaabaire kahendekire. Kandi eshagama neereetwa omu maisho ge, n'omu nyindo, hamwe n'omu matu. Kandi naareeba aakahare ke, kagufu; kakomirwe n'amapeesha, ake, hanu hamwe n'aha rubaju rw'otunyugunu twako; kandi na twasokisi twako turaingwa tugarwirwe eruguru, nk'oku twabaire tujwara sokisi ndaingwa emyaka eya ira.

37 Reero naamagamaga, kandi buzima nikwo kyabaire kiri, buzima nk'oku Omwoyo Orikwera yaabaire angambiire emyaka ebiri ekyo kitakabaireho, obu mwena mwakihandiika omuri Baiburi zaanyu omu ihanga ryona, ngu kiryabaho. Oo, aho, obwo, ebintu bitereire. N'obu araabe afiire ata, n'obu omuntu weena araagambe ki; kihweire. Naateekwa kuzooka!

Naagira nti, "Omwana ogu ku araabe atazookire omu bafu, biri ndi nabi w'ebishuba, nimba ndi omujwekyerwa w'ebishuba wa Ruhanga. Ahakuba, okwo omu ihanga ryangye, emyaka ebiri echingwire, Akangambira ngu eki kiryabaho. Kandi mbabo aho abaheereza aba, kandi n'abandi, kihandiikirwe aha mpapura z'okubanza za Baiburi zaitu, kandi buzima nkiki hanu. Mukishome aha rupapura rw'okubanza, oku kyabaire 'nikiza kubaho omu ihanga, eririmu enkiri ezitungikiraine, n'ebindi, aryaitwa, kandi n'oku . . . aryaba ari aha rubaju rw'omukono gwa buryo rw'oruguuto." Naagira nti, "Nikyo ekyo. Tihariho ekirkubaasa kukizibira. Byona biri omu buteeka."

Okwikiriza okwabaire kuri omu mutima gwangye kukashukwaho amajuta. Oo, kuri ekyo nimbaasa kukishoboorora! Okwikiriza oku Ruhanga . . . oku naabaire nyine omuri Ruhanga, owangambiire, kandi tikukaremwaga na kakye, akangambira ati, "Embeera eri omu buteeka hati. Nkiki hanu buzima eki naakworekire emyaka ebiri echingwire, mbwenu nkiki hanu buzima omu buteeka. Ekintu kyonka eki oshemereire kukora n'okugamba ekigambo." Reero akoojo ako kaazooka omu bafu. Mwareeba?

38 Naaba nindeeba enyima Ow'eishe-emwe Fred Sothmann ashutami aho, n'Ow'eishe-emwe Banks Wood n'abandi. Ekiro kiri, eruguru aha-aha Muhanda rugyendwa gwa Alaska, oku naayemereire hanu omu kanisa kandi nkabagambira mwena aha nyamaishwa eyaabaire eri nk'engabi y'amahembe g'amataagi, gaine oburaingwa bwa inci makumi ana na ibiri, n'edubu ya gaaju eine erangi nk'ey'efeeza aha mutwe. Nkaba ntakazayoga, kandi oku . . . naabaire ninza kugitunga, n'oku byabaire nibiza kuba, n'omuhendo gw'abantu abaabaire nibaza kuba bari hamwe naanye, kandi n'oku baabaire nibaza kuba bajwaire. Nimukimanya, mwena, zaasaabiiti na zaasaabiiti kitakabaireho.

Kandi okwo ku naaggiireyo, ntarikukimanya, egoy nyamaishwa ekaba ebyami aho. Reero naagyenda, kandi kandi eka . . . kikaba kitarikubaasika. Omuhiji ku yaakuba naamanya, nari akahurikiza orutambi rw'amaraka oru, oku otarikubaasa kugyenda okahika omu maisho g'enyamaishwa, ekaimuka jubajuba kandi eiruka. Kwonka terakikozire.

39 Kandi ngigyo ehanikire okwo omu kishengye kyangye ky'okushomeramu. Ngigyo edubu y'erangi y'efeeza ha mutwe ehanikire, buzima omu muringo ogwo gwonyini. Kandi-kandi na ruula erambikire aho, orukoba rw'okupimisa, kworeka ku oburaingwa bwayo buhikiire kimwe. Kandi eihembe obundi rikyendeera inci ibiri n'okukiraho, ryaba riri ribisi aha nyamaishwa bwanyima rikooma, kwonka eri ryo tirirakyendeire na kakye. Rikiri aha kipimo kyonyini ekya inci makumi ana na ibiri. Mwareeba? Ngigyo edubu y'erangi y'efeeza ha mutwe erambiire aho, eine fuuti mushanju oburaingwa, buzima kwo, na buri kimwe nk'oku kyabaire kiri buzima, biri aho hati.

Kwonka ogu mushaija ku yaagambire ati, "Hati, reeba, Ow'eishe-emwe Branham, twabona egoy enyamaishwa ei ogambireho, kwonka okangambira ngu nooza kubona edubu ya gaaju eine erangi nk'ey'efeeza aha mutwe otakahikire ahansi y'akabungo, kugaruka kuriya ei aboojo abo bari, ogwo ojwaire esaati ya kinyaatsi."

Naagira nti, "Ni OKU NIKWO MUKAMA ARIKUGIRA. Ruhanga nikwo yaagambire."

"Kwonka, Ow'eishe-emwe Branham," yaagira ati, "nindeeba ahantu hoona okwehinguririza omwanya ogu, zaamahiro na mahiro hare okwo, tihariho ekintu kyona. Neeruga hi?"

40 Naagira nti, "Ekyo t'oshemereire kukimbuuza. Ruhanga nikwo yaagambire! Kandi Ni Yehova-Yire. Naabaasa

kureeta edubu aho. Naabaasa kutaho emwe aho.” Kandi Akakikora. Kandi ngigyo aho. N'embeera eri omu buteeka.

Kandi Musa ku yaareebire ngu akazaarwa ahabw'ekigyendererwa eki, kandi ngu akaba abugaine amaisho na maisho, Ruhanga w'amaani ogu Owaamwetsire, kandi akamushukaho amajuta kandi akamworeka, akagira ati, “Oku n'okwetwa kwawe, Musa. Ninkutuma, kandi Ninja kukworeka ekitiinisa Kyangye. Kandi Ndi hanu omu rushaka, orurikwaka. Shuumayo! Niinyija kuba Ndi hamwe naiwe.” Nangwa akaba atarikwetenga n'enkon. Akaba aine Ekipambo, Ekipambo ekihamiibwe, kandi yaazayo. Kikashuka amajuta aha kwikiriza okwabaire kuri omuriwe.

Kandi nikitushukaho amajuta ku turikureeba ngu turi omu biro by'aha muheru, kumanya ngu obumanyiso obu bwona obu turikureeba burikubaho, obwagambirweho omu Byahandiikirwe, ngu buryabaho omu biro by'aha muheru; kurugira kimwe omu Iguru, kuhika omu bushoboorozi bw'ebi'obutegyeki, n'obuhangwa bw'abantu, n'okusiisikara kw'emicwe y'ensi, hamwe n'ey'abakazi, kandi n'oku barikora omu biro by'aha muheru, n'oku abashaija barikora, kandi n'oku amakanisa garikora, oku amahanga garikora, kandi n'oku Ruhanga arikora. Kandi nitubireeba byona bituriho.

Oo, nikishuka amajuta aha kwikiriza kwaitu. Nikitiwa omu bibiina by'amaani. Mwareeba? Ni-nikitutaanisa n'ebindi bintu by'ensi. Mwareeba? N'obu twakuba turi ab'ahansi tuta, nari turi omubaro mukye munonga tuta, tukashekyererwa munonga, tukashungisibwa, tikirikureetaho ntaaniso yoona. Nikyo ekyo kyonka. Nitukireeba. Hariho ekintu ekiri omuriitwe. Tukatooranwa ira tutakabaireho kureeba obwire obu, kandi tihariho ekintu kyona ekirikuza kutuzibira kubureeba. Amiina! Hanu Ruhanga akakigamba. Kya-kyaherize kubaho. Nitukireeba. Oo, ka nitusimma Ruhanga ahabw'eki! Oo, obwo, nikiimutsya okwikiriza kwawe twareeba ebintu ebi birikubaho hanu.

41 Hati, hanu nitugaruka tushoma ngu, “Musa akateekateeka okujumwa naaturwa Kristo ku kuri eitungo ringi okukira obutungi bwa Misri.” Hati, akateekateeka o-okujumwa naaturwa Kristo.

Hati oijukye, “okujumwa nooturwa Kristo.” Waareeba, noojumwa waaba nooheereza Kristo. Ku oraabe nookundwa ensi munonga, obwo torikubaasa kuheereza, torikuheereza Kristo. Ngaaha, torikubaasa. Ahabw'okuba, nimureeba, noojumwa waaba n'Omuheereza. Ensi etuura neejuma.

Enyima hare okwo, emyaka enkumi n'enkumi ehweire, hakaba hariho ekijumo ekyabaire kigyenda Nakwo. Kandi Musa owaabaire ari ow'okuba Faraho, akaba ari Faraho owaabaire naaza kukurataho, mutabani wa Faraho. Kandi akaba ari Faraho owaabaire naaza kukurataho, aine obuganzi omu bantu, kwonka nabwo “akateekateeka . . .” Okuteekateeka nikimanyisa “o-okwetegyereza.” “Akeetegyereza okujumwa naaturwa Kristo ku kuri eitungo ringi okukira byona ebi Misri yaabaire neebaasa kumuha.” Misri ekaba eri omu mikono ye. Kwonka, nabwo, akaba naamanya ngu okutoora omuhanda gwa Kristo kukaba kuri okujumwa, kwonka akashemererwa munonga kumanya ngu hakaba harimu ekintu omuriwe, ekyatumire yaateekateeka aha kwija ahari Kristo, okujumwa naaturwa Kristo, nimmanyisa, okukira eby'okweschemeza byona ebi ya-yaahungwire. Akaba aine obuhunguzi omunda ye obwabaire nibukirira hare ebi obuhunguzi bw'aheeru bwabaire bumuhaire.

42 Oo, kuri nitubaaasa kuba tutyo ebiro ebi, kandi tukareka Omwoyo Orikwera akashuka amajuta ahari ekyo ekiri omuriitwe, okwikiriza okwo, kutuhitsya aha magara agarikutiina Ruhanga, ageehaireyo ahari Kristo!

Hati, n'okwikiriza nk'okwo oku yaabaire aine, akareeba, kandi yaayetegyereza okwo kujumwa ku n'ekitiinisa.

Ebiro ebi, omuntu naabaasa kugira ati, “Yeiwe, ori omwe ahari abo bantu, abo?”

“Aha, aha, mpaho, aha.” Kikushwazaho kakye.

Kwonka akitwaramu kuba eky'obuguzi bwingi okukira ensi yoona, ahabw'okuba omuriwe hakaba harimu ekintu eki yaabaire naabaasa kugamba kandi akagira ati, “Eego, eki ni-ninkitamu ekitiinisa. Eki n'eky'ekitiinisa kingi. Ninshemererwa kuba omwe aharibo.” Mwareeba? “Ninshemererwa okwebara nk'Omuhemburaayo kwonka ntari Munyamisri.”

43 Abakristaayo ebiro ebi bashemereire kugamba ekintu nikyo kimwe. “Nshemereirwe kumanya ngu ndi Omukristaayo, kureka ebintu by'ensi hamwe n'entwaza y'ensi. Atari nka memba w'ekanisa kwonka, kureka nk'Omukristaayo ozairwe obwa kabiri orikutuura nk'oku Ebyahandiikirwe bigira. N'obu naakwetwa, nangwa na baamemba b'ekanisa, 'orikurengyesereza omu kwikiriza,' nabwo ekyo nka-nka-nkakitwaramu nk'ekintu kikuru-kikuru okukira oku naakubaire kuri ndi omuntu orikukirayo kukundwa munonga omu rurembo nari omu ihanga. Haakiri mba ekyo okukira kuba Purezidenti wa Amerika, nari-nari omugabe w'ensi. Nimureeba? Ekyo ni-ninkitwaramu kuba eky'ahaiguru munonga, ahabw'okuba Ruhanga omu kusaasira Kwe, omusingye gw'ensi-ensi gutakateirweho, akandeeba, kandi-kandi yaatamu embibo nkye omunda omwo, kugira ngu okwikiriza kwangye kubaase kugyendera ahaiguru y'ebintu ebi by'ensi. Mbwenu hati Anyetsire, kandi omwanya gwangye ni-ninguha ekitiinisa.”

44 Nk'oku Paulo yaagambire, akatwaramu obuheereza bwe kuba bukuru munonga . . . mwareeba, kandi, oo, ngu Ruhanga akaba amwetsire kureka kuba omwegyesa mukuru nka Gamalieli. Kureka Paulo akaba ayetsirwe kuba ekitambo ahabwa Kristo. Mwareeba? Hati ekintu nikyo kimwe.

Mwetegyereze, aine okwikiriza nk'okwo, tareetsigire ebi yaabaire naareeba na kakye, ebi yaabaire naabaasa kureeba. Hati, tarareebire ekintu kyona aheeru okwo kureka ekibiina ky'a-abantu abarikukaata obudongo, abahuuku, abari omu nkomo, nibaitwa buriizooba, nibateerwa kibooko, nibashungwa, okwikiriza kw'ediini yaabo, bakaba bari, "abarikurengesereza omu kwikiriza." Kandi hakaba hariho Faraho owaayemire aha ngoma, owaabaire atarikumanya n'obu kwakuba okweta aha kintu kyona ekikwatsire aha diini yaabo. Tihariho ekintu kyona ki yaabaire naagimanyaho. Akaba ari omukaafiri, n'ahabw'ekyo aka . . . Ka n'ekishushani ky'eriizooba! Kandi nkikyo aho, ediini y'omutaano. Kandi n'oku ngu kuri-kuri Musa ogu, kandi obwo ashutami omu ntebe emwe na Purezidenti, nari-nari omuntu mukuru, Faraho, ari ow'okuza omu mwanya gwe ahanyima y'okufa kwe, kandi akaba ari omugurusi. Kwonka nabwo Musa akateekateeka ngu okwetwa okwo . . . Akareeba aheeru okwo, kandi omu dirisa niyo emwe ei Faraho yaabaire naareeberamu, 'habw'okuba akaba ari omu ka ye.

Kandi Faraho akareeba aheeru kandi yaareeba abo bantu abaabaire nibaimutsya emikono yaabo, kandi bakaba bakwata kibooko reero babateera babaita ahabw'okuba bakaba nibashaba. Babacumita zaarurara ahabw'okuba bakaba baremwa, banga kukuratira ebi baaragirwa kukora obwire bwona, kandi babakozesa okuhitsya obu emibir yaabo mikye ekuzire yaabaire ewh'amaani, kandi babaha eby'okurya bikye ebitarikubahaazya. "Mbwenu, bakaba batari kindi kureka ekibiina ky'abarikurengesereza omu kwikiriza, haihi batari bantu."

45 Kandi obwo Musa, okwo kwikiriza okwabaire kumurimu, akabareeba, reero yaagira ati, "N'abantu ba Ruhanga abahairwe omugisha." Amiina. Ekyo ninkikunda. Aine okwikiriza nk'okwo, amaisho ge tigarareebire eby'okweshemeza bya Misri, gakareeba okuraganisa kwa Ruhanga. Eriisho rye ry'empungu ry'okwikiriza rikareeba okurenga aha by'okweshemeza bya Misri. We, mwijukye, ariyo naaba empungu hati. Ni nabi, n'ahabw'ekyo eriisho rye ry'empungu ryaimuka ryaza ahaiguru y'ebintu ebyo. Oo, ekyo ka ninkikunda! Haa! Mugyenzi!

Ka ni kaingi ebiro ebi, ebiro ebi, Abakristaayo beegamira ebihurikizo byabo, kandi n'ebi barikubaasa kureeba, nari ebi barikubaasa kwetegyereza, omu mwanya gw'okwikiriza kwabo, kwegamira ebi orikureeba n'eriisho ryawe n'ebi'okweshemeza. Nkaimwe abakazi, burijo mbeehanangiriza nimbagambira, nti mushemereire kureka amashokye gaanyu gakakura, timushemereire kwesiiga erangi, nimuteekwa kutwaza nk'abakazi barungi kandi Abakristaayo. Muranye omu nguuto z'omu rurembo haza mureebe abakazi ebi oku bajwaire eby'obwamaraaya. Mpaho, nooteekateeka oti, "Mbwenu, ka ni memba w'ekanisa, ekyo ahabw'enki naanye ntarikukikora?" Mwareeba? "Kandi naashara eishokye rye, ahabw'enki-ahabw'enki ekyo naanye ntarikukikora? Mpaho, naareebeka kuba ari murungi nk'abandi, kandi omunyabwengye nk'abandi, kandi aine n'emitarize mirungi ei ntaine. Mpaho, ahabw'enki ekyo naanye ntarikukikora? Nshemereire kukikora." Ekyo waakikora, nooshanyaraza okwikiriza kwawe. Waareeba? Torikuha okwikiriza kwawe omugisha gw'okukura. Tandikira ahari ekyo, nk'oku naaheza kugamba.

46 Omuntu omwe akagira ati, "Ow'eishe-emwe Branham, eihanga, abantu, nibakutwaramu kuba nabi. Toshemereire kuba nooyamagirira abakazi otyo, hamwe n'abashaija, ahabw'ebintu ebi. Iwe, oshemereire kuba noobeegyesa oku-oku bashemereire kuragura n'okutunga ebiconco."

Naagira nti, "Nimbaasa nta kubeegeyesa kubara egumire kunu batarikumanya na za ABC zaabo?" Mwareeba?

Hati tandikira ahari ekyo. Yeshemeze kugira ngu waashohora okatambura omu ruguuto rw'omu rurembo oreebekye nk'Omukristaayo, omu muringo gwona, waareeba, reero ogumizemu nootwaza nk'Omukristaayo. Waareeba? Kandi torikubaasa kukikora iwe wenka. Nikyetaagisa Kristo kukutaahamu. Kandi egyo mbibo ku eraabe erimu, haza ogwo Mushana gukagijwera, neeza kuhinduka Ehuriire. Ku eraabe etahindukire Ehuriire, nihaba haabaire hatarimu ekintu kyona ky'okuhinduka Ekihuriire. Ahabw'okuba, buzima kikahamibwa aha bandi, mwareeba, neehinduka Ehuriire ahonaaho Omushana gwagijwera.

47 Okwo n'okuhana abakazi, nimmanya, abahurikiize orutambi rw'amaraka oru, nari abaraije kuruhurikiza. N'okuhana, ow'eishe-emwekazi. Nikwo kishemereire kuba. Nikwo kishemereire kuba, ahabw'okuba nikireebeka. Tindikufayo eki waakozire; noobaasa kuba otwire ori omunyadiini, obwire bw'amagara gaawe bwona, noobaasa kuba otwire omu kanisa, sho naabaasa kuba ari omuheereza, nari baro naabaasa kuba ari omuheereza; kwonka obwire bwona ku oraagomere E-Ekigambo kya Ruhanga, nikyoreka ngu tiharimu Magara. Waareeba ekintu kyashuuuruwa, n'Amagara g'Omwoyo Orikwera, Gareebe ku Garaahikye aha bandi. Reeba ebi baraakore, yaaba Garaabatemu amagara. Tiky'okutangaaza ahabw'enki . . .

Ka n'oku-ka n'okukabukira abo Bafarisaayo, abaayetsire Yesu, kunu Yaabaire naabaasa kumanya ebiteekateeko byabo, Akabeeta, "Belezebuli."

Kwonka ogwo maraaya omukye akagira ati, "Ahabw'enki, Omuntu ogu niwe Mesia. Ebyahandiikirwe nibigira ngu ebi nibyo Arikora." Mwareeba, egyo mbibo eyaamanyirwe ira etakabaireho ekaba erimu. Reero Omushana ku gwagijwereire, yaaba Ehuriire. Torikubaasa kugizibira kurugayo. Amagara tokaagashereka.

Noobaasa kutwara enkogoto kandi ozishukye aha bunyaatsi, kandi obwite omu bwire bw'obutiti. Omu bwire bw'okutooka oburikukurataho, obunyaatsi bwawe oburikukira obwingi burahi? Bwehinguririize ezo nkogoto aha rubaju. Habw'okuba, egyo mbibo ehairwe amagara eri ahansi y'eryo ibaare, eizooba ku ririkutandika kujwa,

torikubaasa kugigumya ahansi okwo. Neija kwemyora emigisirize eyetooroore ebone omuhanda gwayo kurabira okwo reero etunguukire aha rubaju rw'enkogoto kandi ete ahaiguru omutwe gwayo kuhimbisia Ruhanga. Mwareeba, amagara tokaagashereka. Eizooba ku rijwa aha magara g'ebimera, nibiteekwa kuba ebihuriire.

48 Kandi Omwoyo Orikwera ku ahika aha Magara g'Ebyahandiikirwe agari omu muntu, nigaana ebyana aho aho. [Ow'eishe-emwe Branham yaateera enkomyo -Omur.] Mwareeba?

N'ahabw'ekyo n'obu waakuba ori ow'amazima kandi omwesigwa ota, oku orikugira ngu tikwo ori, kandi noogamba, noogira ngu babaire . . . Abakazi aba abajwaire ebijwaro bibi ebi-ebi kandi n'ebindi aheeru okwo, abari nk'abajwaire busha b'obutoosha, omu ruguuto rw'omu rurembo. N'obu, otarikwikiriza ngu nikwo ori, torikubaasa kwereetera okwikiriza. Noobaasa kuhamya ngu toine rubanja rw'obushambani, kwonka, omu Kitabo kya Ruhanga, oriyo nooshambana. Yesu akagira ati, "Orikureeba omukazi akamwetenga, biri aherize kumushambanaho omu mutima gwe." Kandi niiwe oyeyanikire omu buryo obwo. Waareeba, tokaakireeba shana ago Magara gaaba garimu.

Nooreeba omuntu ondiijo, nooreeba kandi ogira oti, "Mpaho, nimmanyia Ow'eishe-emwekazi Jones. Ow'eishe-emwe Jones ni . . . N'omuheereza. Omukazi we naakora eki kandi akora na kiri."

Tindikufayo eki oriya akora; Eki n'Ekigambo. Yesu akagira ati, "K'ekigambo kya buri muntu kibe ekishuba, kwonka Ekyangye kibe amazima." Ni Baiburi. Kandi buzima ogwo Mushana ku gurikugijwera, neeteekwa kugira Amagara. Neeteekwa kugira Amagara.

49 Hati, eriisho rikuru rya Musa, eriisho rye ry'empungu, rikareeba ryarenga eby'okweshemeza bya Misri.

Omukristaayo omwikiriza w'amazima ebiro ebi, n'obu ekanisa yaakugamba ki, eki omuntu ondiijo weena yaakugamba; ogwo Mushana ku gugijwera, baareeba okweyoreka kwa Ruhanga kwonyini, egoy Nyomyo y'Omuriro neezeereera aho, n'obumanyiso n'eb'y'okutangaaza ebyaraganisiibwe, Ebyahandiikirwe biriyo nibiteebwa aho, kandi eba Ehuriire; n'obu yaakuba eri nkye munonga eta, kandi bari bakye munonga bata. Ekibiina kya Ruhanga obutoosha kituura kiri kikye. Mwareeba? "Mutatiina, imwe obusyo bukye-bukye, ahabw'okuba Shoimwe naasiima munonga kubaha Obukama." Mwareeba? Nibakitunga. Ruhanga naagyemwa kubaiha omuri buri kigombe ky'ediini akabareeta akabataasyamu, buri ntwaza yoona ahantu hoona, Kukireeba, ku baraabe baatooraniirwe Amagara.

50 Reeba omugurusi Simeoni, owaatooraniirwe Amagara. Mesia ku yaizire omuri Hekalu, omu muringo gw'omwerefere ori omu mikono ya nyina; Simeoni, enyima omu kishengye ahantu nanka, naashoma. Omwoyo Orikwera akamwimutsya, ahabw'okuba akaba ategyereize. Ago Magara gakaba gamurimu. Akagira ati, "Tindifa ntakareebire Kristo wa Mukama." Mbwenu ngugwo aho Kristo wa Mukama omuri hekalu. Omwoyo Orikwera akamwiha aha murimo gwe yaamwebembera, yaamushohoza, kandi yaashuumaa yaarabira okwo reero yaakiikira omwerefere ogwo, kandi yaagira ati, "Reka-reka omwiru Waawe agyende n'obusingye, ahakuba amaisho gangye gaareeba okujuna Kwawe."

Hakaba hariho omukaikuru empumi omu nshonda, orikwetwa Anna, owaabaire aramya Mukama nyomushana na nyekiro. Nawe akaba naaragura, kandi naagira ati, "Mesia naija. Nimmureeba naija." Kandi obwo, yaabaire ari empumi. Omu bwire nibwo bumwe, ku Yaabaire ari okwo . . . Ago Magara makye agaabaire gamurimu, agaabaire nigaragura gati, "Nikiza kubaho! Nikiza kubaho! Nikiza kubaho!" Bwanyima, ago Magara nigo gamwe, Omushana ogwo gwataaha omu kyombeko, omu muringo gw'Omwerefere, "nk'Omwna ekizaarwa," atairwe omu twenda Twe tw'obwerefere, naaraba omu kyombeko. Reero Omwoyo Orikwera yaakora aha mutima gw'ogwo mukaikuru empumi, reero yaayebemberwa Omwoyo, yaamwebembera yaamurabya omu bantu, yaayemerera omu maisho g'ogu Mwana; kandi yaaha nyina omugisha kandi yaaha n'Omwna omugisha, kandi yaaragura n'Ebirimubaho omu biro by'omu maisho. Mwareeba, bakaba baatooraniirwe Amagara! Mwareeba?

Bareebe, bakaba batari baingi. N'abantu munaana bonka abaajunirwe omu biro bya Noa, batari baingi na kakye, kwonka boona abaabaire baatooraniirwe Amagara bakataahamu omu bwire obwo. Nimureeba oku Omwoyo Orikwera arikukora omuri buri busingye, naihayo abantu.

51 Hati nitireeba ngu okwikiriza kwa Musa kukamwebembera kwamureebesa ebyabaire nibiza kubaho, bitari ebyabaire biriho. Reeba ebya nyencakare omu mwanya gw'eb'y'eriizooba. Reeba okuraganisa omu mwanya gw'eb'y'okweshemeza. Reeba abantu omu mwanya gw'ekibiina ky'ediini. Mwareeba? Ekyo Ruhanga akakikora.

Looti akaba naareeba eby'okweshemeza by'obutungi okwo omuri Misri, nimmanyisa okwo omuri Sodoma. Looti akaba naareeba emigisha y'o-y'okutunga . . . e-esente nydingi munonga. Looti akaba naareeba obutu- . . . okubaasika ku yaarangize Sodoma kandi obundi akaba naabaasa kuba . . . Ahabw'okushangwa yaabaire ari Omuheburaayo, akaba naabaasa kuba omuntu mukuru okwo, ahabw'okuba akaba ari omuntu omunyabwengye munonga, kandi omwihwa wa Abrahamu, n'ahabw'ekyo yaacwamu kutoora ogurikuza Sodoma. Obwengye bwa Looti bukamwebembera kureeba eby'okweshemeza by'o-by'obutungi. Obwengye bwa Looti bukamwebembera kureeba omugisha gw'e-gw'eb'y'okweshemeza. Kwonka, bikashanyaraza okwikiriza kwe munonga, tarabaasize kureeba omuriro ogwabaire niguza kucwekyereza amagara g'omuringo ogwo.

Kandi okwo nikwo abantu bari ebiro ebi. Nibareeba oku kirikubaasika kuba memba w'ekibiina ky'ediini

ky'amaani, nibareeba oku kirikubaasika kugira ekitiinisa omu bantu b'orurembo, kwonka tibarikureeba oku kirikuba- . . . Tibakaareeba ngu okwikiriza kwabo kushanyaraire. Ekyo ka nkigarukyemu kugira ngu kitaija kwetegyerezibwa kubi. Abakazi ebiro ebi, bo, nk'oku ndiyo ningamba, nibenda ku-nibenda kutwaza nk'abazaani ba katemba. Abashaija ebiro ebi nibenda kutwaza nk'abazaani bakatemba b'ahari televijoni.

52 Ababuurizi ebiro ebi nibareebeka nkabarikwenda kuhindura amakanisa gaabo nk'ekibiina ky'abeeteeraine ky'omutindo nanka gw'eriigyenda, obwa memba n'ebindi. Nibareeba obundi oku kirikubaasika kuba bishopu nari omureeberezi mukuru, nari ekintu nk'ekyo, ku baraagumizemu n'ekanisa; bakatsigaho Ebyahandiikirwe, kunu Biri omu maisho gaabo honyini, bihamiibwe kurungi munonga Amaani ga Ruhanga, kandi n'Ekgambo kya Ruhanga ekihuriire ekitwire omu bantu. Kwonka nabwo, Tibarikukyenda. Nibagira bat, "Titurkwenda kwejwanga n'ekintu ekiri nk'Ekyo." Nikibaasa kubaihaho kaada zaabo z'okukwatanisa. Nikibaasa kwihihaho entwaza z'ekigombe kyabo ky'ediini. Kunu ari omuntu omwesigwa, nka Looti, ashutami eifo okwo omuri Sodoma, naamanya ngu ekyo kigwire. Mwareeba? Mwareeba? Nibakora ki ku barikukora ekyo? Nibashanyaraza okwikiriza kukye oku babaire baine. Tikikaakora.

53 Hati, Musa ebyo akabireka, kandi yaata . . . okwikiriza kwe kwashanyaraza ensi.

Okwikiriza kwawe nikwija kushanyaraza eby'okweshemeza by'ensi, nari eby'okweshemeza by'ensi bishanyaraze okwikiriza kwawe. Hati, nooteekwa kwihamu kimwe omuri ebyo. Kandi nooreeba Baiburi tehinduka. Ruhanga tahinduka. Ni Ruhanga otahinduka.

Kandi hati nitushanga ngu, ebiro ebi, abantu b'ebiro ebi, mwareeba, nibenda ebintu by'amaani, ebibiina by'ediini by'amaani. "Ndi memba w'ekibiina Nanka na nanka." Mwareeba? Kandi bashuumayo, kandi, reeba, tihariho entaaniso n'abantu b'omu ruguuto rw'orurembo. Tihariho ebintu ebindi. Baine ekintu kikye ky'obwengye, reero bagumizamu. Ku orikugamba aha kutamba kwa Ruhanga, Enyomyo y'Omuriro, Omushana gwa Ruhanga, bagira bat, "Ebyo n'ebiteekateeko."

54 Omushaija akakwata ekishushani kya Maraika wa Mukama, ekiro kiri, omuheereza w'Ababaputisiti, reero Yaakishekyerera. Mwareeba, okwo-okwo n'okurogota. Mwareeba? Ekyo tikikaasaasirwa.

Ekyo nikyo Yesu yaagambire, mwareeba. N'okurogota; Waamureeba naakora emirimo yonyini ei Kristo yaakozire. Kandi Akagamba . . . Kunu, bakareeba egoy mirimo omuri Kristo, Akaba ari Ekitambo, kwonka baamweta "Belezebuli, daimoni," ahakuba, 'habw'okuba, Akaba naagikora. Mbwenu hati nibagamba . . . Akagira ati, "Ekyo naakibasaasira. Kwonka Omwoyo Orikwnra ku ariija okukora ekintu nikyo kimwe, Okamurogotaho, tikirikusaasirwa na kakye, mu nsi egi nari ensi erikwija." Waareeba? Nikikwetaagisa Kumurogotaho ekigambo kimwe kyonka. Mwareeba? Reero . . .

Ahabw'okuba, Amagara ago ku garaabe, ku oraabe waatooraniirwe Amagara Agatahwaho, obwo Amagara ago gakaija ahonaaho Waakireeba. Okaakyetegyereza, nk'oriya mukazi mukye aha iziba, n'a-n'abandi abatari bamwe. Kwonka egoy mbibo yaaba etarimu, terikubaasa kugira Amagara, ahabw'okuba tiharimu ekintu kyona ky'okugira Amagara. Nka maawe omukaikuru oku yaabaire agamba ngu, "Torikubaasa kwiha eshagama omu mondi," ahabw'okuba eshagama terimu. Hati, nikyo kimwe.

55 Kandi nikishanyaraza okwikiriza kukye oku oine. Looti akaba naabaasa kureeba eby'okweshemeza by'ensi, kwonka akaba ataine okwikiriza okurikugasha kureeba omuriro ogwabaire niguba kwotsya eby'okweshemeza nk'ebyo.

Niinyebuuza yaaba twine ebiro ebi? Niinyebuuza yaaba itwe, mpaho, nk'abakazi abarikwenda kukundwa abantu baingi, abarikwenda kutwaza nk'a-abandi bakazi b'omu kanisa, ku barikureeba ngu nibenda ku-kutwaza nk'abandi. Ni-nibareeba ngu nikibaasika kuba o-o-omukazi oboneire munonga, ahabw'okwesiiga erangi. Nibareeba omukazi oboneire munonga ahabw'okugira endeebeka y'obuto, ahabw'okushara eishokyre ryabo kandi n'okutwaza nk'abandi, nari omuzaani wa katemba. Kwonka niinyebuuza yaaba ekyo kitashanyaraize okwikiriza kwabo, okumanya ngu Baiburi neegira ngu, "omukazi orikukora ekyo n'o- . . . n'omukazi otaine kitinisa," kandi, "omukazi orikujwara kishaija, n'ekirikunugwa omu maisho ga Ruhanga," empare ezigarukiire omu maju, n'ebindi, hamwe n'ebijwaro bigufu munonga ebi barikujwara. Kandi-kandi nikishanyaraza munonga okuhitsya obu kirikuba ekintu ky'obutoosha aha bantu abarikukikora. Niinyebuuza yaaba batarikushanyaraza okwo kwikiriza kukye oku obaire oine, nangwa n'okuza aha kanisa, nooreeba. Ekyo nikyo kintu eki kirikukora.

56 Looti ekyo akakikora, kandi kyamushanyaraza, kandi kyashanyaraza abantu be eifo okwo. Bakaba batarikubaasa kukireeba.

Kwonka Abrahamu, aine o-okwikiriza okuhamiibwe, ishento, tarataire maisho ge aha by'okweshemeza by'ensi, akaba atarikwenda ekintu kyona ekiine akakwate nabyo, n'obu kyamwetaagiise kutuura amagara agagumire kandi n'okutuura wenka. Kandi Saara akatuura okwo omu ihamba ahaabaire hagumire kutuura, omu nsi etarikweza. Kwonka tibarataire maisho aha by'okweshemeza by'ensi nari oku kyabaire nikibabaasikira kukundwa abantu baingi.

Saara, omukazi owaabaire naakirayo kubonera omu nsi, Baiburi nikwo erikugamba. Akaba ari murungi, murungi munonga okukira abakazi boona. Kandi hati nangwa akagumayo kandi yaayorobera iba, okuhitsya n'obu

yaamwetsire "mukama" we, ou Baiburi erikugambaho, okwo omu-omu Ndagaano Ensy; ekagira eti, "Muri bahara be, mwaba nimworobera okwikiriza." Mwareeba, akeeta iba "mukama" we.

Kandi Maraika wa Mukama yaataayaayira hekalu yaabo kandi . . . nimmanyisa eihema ryabo rikye ebiso okwo, kandi yaabagambira. Bakaba bataine n'enju y'okutuuramu; bakaba batwire omu nsi etarikweza. Kandi nkikyo aho. Nooreeba ebi ku byagaruka bikashusha n'eby'enyima, buzima kwo nk'oku byabaire biri obwire obwo?

57 Hati, Musa n'okwikiriza kwe kwingi, omurundi ogundi, akaba naabaasa kugira ati "ngaaha" aha bintu ebiraho eby'ensi eby'ebiro ebi, kandi acwamu okutoorana okuhikiriire. Akaihamu okukorwa kubi hamwe n'abantu ba Ruhanga. Akaihamu kugyenda nabo. Ahabw'enki? Okwikiriza kwe! Akareeba okuraganisa. Akareeba obwire bw'aha muheru. Akareeba ebya nyencakare, reero okwikiriza kwe kwahama. Kandi tarataire mutima aha bi amaisho ge gaabaire nigareeba nk'ebirkubaasika hanu, ngu akaba ari Faraho kandi akaba naaza kuba Faraho. Akareeba okwo omu bya nyencakare.

Oo, abantu kuri nibakora ekyo kyonka, batareebe eby'ensi by'ebiro ebi. Ku oraareebe eby'ensi by'ebiro ebi, noobitoorana. Shereka amaisho gaawe ahari ebyo, reero oreebe okuraganisa kwa Ruhanga, okwo hare omu bya nyencakare.

Ahabw'okwikiriza kwe akaba naabaasa kutooranamu. Akatooranamu kwetwa omwana wa Abrahamu, kandi yaayanga kwetwa omwana wa Faraho. Akaba naabaasa ata, kunu obugabe bwona . . . Misri ekaba neetegyeka ensi. Akaba ari omugabe w'ensi, kandi akaba ari omushaija muto w'emyaka makumi ana y'obukuru, hanu ayeteekatekire kwema aha ngoma. Kwonka tarareebire obweng- . . .

58 Reeba abakazi abaabaire nibaza kumwehinguririza, buriizooba, baingi munonga. Reeba eby'okweshemeza; kushutama akanywa viinyo, kandi akareeba abakazi abarikuzaana emizaano y'okujuura ebijwaro byabo omu maisho ge, obwo bariyo nibazina, kandi nibamuhuuuhira embeho n'eki . . . Kandi abakazi okuruga omu nsi yoona, hamwe n'amahunde n'ebi'obuguzi bwingi, eihe rye riri ebiso aho. Ekintu kyonka eki yaabaire naateekwa kukora kukaba kuri okushutama kandi akarya eby'okurya bye birungi, reero akagira ati, "Yohereza e . . . yohereza engabo z'enkambi namba egi n'egi eifo okwo omu ihanga nanka na nanka, mukubuure eihanga eryo. Ningira ngu nindyentega." Nikyo ekyo kyonka eki yaabaire naateekwa kukora. Kushutama aho, reero nabo bakamuhuuuhira embeho, haza akaashamya akanwa ke; akaikiriza abakazi ba-barungi munonga abari nk'abajweire busha b'ebiro ebyo, bakashuka viinyo omu kanwa ke, bakamugaburira eby'okurya bye bamubumbatiire omu mikono yaabo, abakazi boona barungi munonga b'omu nsi. Eby'okweshemeza byona ebyabaire biriho, bikaba biri aho bimwehinguririize.

Kwonka akakora ki? Ebyo akabirenzya amaisho. Akaba naamanya ngu omuriro guriho ebyo gubitegyereize. Akaba naamanya ngu rufu eri omuri ebyo. Mwareeba? Akaba naamanya ngu nikwo kiri. Reero yaaranzya seeri ekibiina ky'abantu abarikugaywa kandi abangirwe, kandi ahabw'okwikiriza yaacwamu kujumwa naaturwa Kristo, kandi yaayeyeta ngu, "Ndi omwana wa Abrahamu. Tindi mwana wa Faraho ogu. N'obu mwakumpindura bishopu, nari omudiikoni, nari acibishopu, nari paapa, tindi mwana w'ekintu eki. Ndi omwana wa Abrahamu, kandi niinyetaanisa n'ebantu by'ensi." Amiina, amiina, kandi amiina! Ahabw'okwikiriza, akakora ekyo!

59 Akaihaho eby'okweshemeza by'ensi ebyo. Akaihaho eky'okubaasa kuba bishopu oraakurateho, yaihaho e-eky'okubaasa kuba acibishopu oraakurateho, nari omureeberezi mukuru omu kutoorana okuraakurateho, nari kyona eki kyabaire kiri, ekyo yaakiihaho. Yaayanga kukiranzya.

"Hati, ku ndaabe bishopu, niinyija kutaahamu reero abantu bagire ngu, 'Tataitwe Orikwera omuri Ruhanga,' nari-nari 'Dokita Nanka na nanka,' nari-nari-nari-nari 'Omukuru w'ekanisa Nanka na nanka.' Ka nibaza ku, abaheereza boona omu ruteerane, nibaza kunteerateera aha mugongo, reero bagire bat, 'Gamba, mwojo 'we, omuntu ogwo hariho eki aine, naakugambira. Oo, shi-shi-shi, mucecekye, ngugu hanu bishopu yaija, mwareeba. Eki araagambe, ekyo n'ekiragiro. Mwareeba, ngugu hanu Nanka na nanka yaija.'" Abantu nibagyendera omu nyonyi baruga aha muheru gw'ensi ku . . . kureeba paapa, n'okunywegyera ekigyere kye hamwe n'empeta, n'ebindi. Oku, ka n'omugisha aha Bakatoriki, ka n'omugisha aha Bapurotesitante, kuba bishopu nari omureeberezi mukuru, nari ekintu nanka, omuntu w'amaani omu kibiina ky'ediini.

Okureeba, nabwo, kwonka, nooreeba, eriisho ry'okwikiriza ebyo niribirenzya amaisho. Kandi oreeba omuheru gwabyo eifo okwo, eki, Ruhanga naagira ngu ekintu ekyo kyona kiriacwekyerezibwa. Okwikiriza, eryo riisho ry'empungu, nirikwimutsya rikuta ahaiguru y'ebyo, reero oreeba ebya nyencakare, bitari by'eriizooba, reero otoorana kwetwa omwana wa Abrahamu.

60 Faraho, ahabw'okutagira okwikiriza, akareeba abaana ba Ruhanga "nk'abarikurengyesereza omu kwikiriza." Ahabw'okutagira okwikiriza, akabahindura abahuuku ahabw'okuba taratiinire ebi yaagambire. Akaba atarikutiina Ruhanga. Akateekateeka ngu niwe ruhanga. Akateekateeka ngu baaruhanga be-be abu yaabaire naaheereza, ngu akaba ari bishopu, akaba ari omureeberezi mukuru munonga, ngu baaruhanga be nibo baakikozire. "Ekintu eki hanu tikiine mugasho," n'ahabw'ekyo yaabahindura abahuuku. Yaabashkeyrerera, yaabashungisa. Nk'oku abantu bakozire ebi, ekintu nikyo kimwe buzima.

Okwikiriza kwa Musa kukabareeba bari omu nsi eyaaraganisiibwe, abantu abahairwe omugisha. Nirubaasa kuba orutaro orugumire kubahitsya aha kuraganisibwa, kwonka Musa akatooranamu okugyenda nabo. Ka nimbaasa kuguma ahari ekyo, kwonka obwire bwangye burikuhwa. Mwareeba?

61 Yetegyereze, nikibaasa kuba ekintu ekigumire kuhindura abantu abo. "Nooteekwa kugyenda okatuura nabo, nooteekwa kuba omwe aharibo, kandi baaherize kuba abanyabwengye munonga torikubaasa n'okubatsimbura. Waareeba? Kwonka nihateekwa kugira ekyabaho aheeru okwo. Nihateekwa kubaho ekirengire eby'obuhangwa ekyayorekwa omu maisho gaabo. Nikiza kuba ekintu ekigumire. Ebibiina by'amadiini nibiza kukwanga, kandi n'ebintu ebi byona nibiza kubaho. Ni-nikitiiisa, eki orikuteekwa kukora, kwonka nabwo tooranamu."

"Ndi omwe aharibo." Yee. Okwikiriza kwe ekyo kukakikora. Okwikiriza kwe kukaimuka. Eego, sebo. Akakireeba. Kikaba kiri ekintu ekigumire kubahitsya omu kuraganisibwa okwo, kwonka akatooranamu kugyenda nabo, oku biri kwona. Atafiire aha bi baamukoreire, kandi n'oku baamwangire, nabwo akagyenda. Akaba naaza kugyenda nabo.

Hati nyine amatsiko ngu nimwetegyereza. Ni kirungi. Oku biri kwona, gyenda nabo. Kora, ba omwe aharibo, ekyo kihikire, ahabw'okuba n'obujunaanizibwa bwawe. Nirubaasa kuba orutaro orugumire, kandi n'ebintu bingi by'okurabamu, kwonka nabwo gyenda.

62 Kwonka okwikiriza kwe kukamwebembera kutooranamu Ekigambo, kwonka bitari by'okweshemeza by'ensi. Akatooranamu Ekigambo. Ekyo nikyo okwikiriza kwa Musa kwakozire. Okwikiriza ku kureeba ebya Ruhanga ebirikukirayo obubi . . . Mwijukye, hanu hakaba hariho eby'okweshemeza hati, ensi, orikukirayo obukuru, omugabe w'ensi. Kwonka abu Ruhanga yaabaire araganiise bakaba barahi? Omu kiina ky'ebyondo, abakaatsi b'obudongo.

Kwonka okwikiriza, okwikiriza ku kureeba ebya Ruhanga ebirikukirayo obubi, kubiteekateekaho kuba bikuru munonga kandi eby'omuhendo munonga okukira ebirungi ebirikukirayo ebi ensi erikubaasa kworeka. Eego, sebo. Okwikiriza ku kubireeba, okwikiriza kwabaasa kubireeba, okwikiriza omu Kigambo kwabaasa kureeba Ekigambo kyorekirwe, nikikira eby'okweshemeza by'ensi byona n'obw'acibishopu n'ebindi byona ebi orikubaasa kugambahao. Okwikiriza nikukikora. Waareeba? Noobaasa kureeba ebirikukirayo obubi, ebirkugaywa, ebyangirwe, n'ebindi byona; n'obu byakukirayo kuba bibi bita, kwonka nabwo okwikiriza nikubiteekateekaho kuba eby'ahaiguru munonga okukira ebirikukirayo oburungi ebi ensi erikubaasa kuha. Amiina! Ogwo nigwo muringo ogu turikweshongoramu ekyeshongoro ekyo tuti, "Niinyija kutoora omu muhanda ogw'aba Mukama abakte abarikugaywa." Mwareeba? Oo, mugyenzi!

63 Ahakuba, nimureeba, okwikiriza kureeba ebi Ruhanga arikwenda ngu bikorwe. Oo, nyine amatsiko ngu eki nikitaahamu. Okwikiriza tikureeba eby'obwire bwa hati. Okwikiriza tikurikureeba eki hanu. Okwikiriza kuhanga amaisho kureeba ebi Ruhanga arikwenda, kandi kukoreraho. Ekyo nikyo okwikiriza kukora. Nikureeba ebi Ruhanga arikwenda, kandi n'ebi Ruhanga arikwenda ngu bikorwe, reero okwikiriza kukora okurabira omuri ebyo.

Okwikiriza n'okworekwa ebintu ebya hare. Tikureeba haihi. Kuguma aha kimaasho. Amiina! Omurashi weena omurungi ekyo naakimanya. Mwareeba? Ngu, n'okureeba ebya hare. N'e-n'ekitangaazo. N'ekitangaazo ky'oburahuri bubiri, eki otarikureebesa ebiri haihi hanu. Torikukoresa ekitangaazo ky'oburahuri bubiri kureeba n'okwetegyereza obwire; mwareeba, torikukoresa ekyo. Kureka nookoresa ekitangaazo ky'oburahuri bubiri kureeba hare.

Kandi okwikiriza kukora ekyo. Okwikiriza kukwata ebitangaazo by'oburahuri bubiri bya Ruhanga, byombi, embaju zombi, Endagaano Ensyu n'Endagaano eya Ira, kandi kureeba buri kuraganisibwa oku Yaaraganiise. Kandi okwikiriza kukireeba hare okwo, kandi okwikiriza kutoorana ekyo kutarikufayo aha bi ebya hati birikugamba hanu. Naareeba eby'aha muheru. Tarikuteishura okureeba kwe kugaruka kureeba kunu. Naareeba hare okwo. Naagumira kimwe omu Kigambo. Ekyo nikyo eki okwikiriza kukora. Okwo n'okwikiriza okuri omu muntu okurikukora ebintu ebyo.

64 Hati reeba. Ebi Faraho yaayetsire, okweta, ebi Faraho yaayetsire bikuru, Ruhanga akabyeta "ekihagaro!" Faraho naabaasa kuba yaagizire ati, "Reeba, Musa, hanu, ahabw'enki, niiwe Faraho oraakurateho. Ni-niinyija kukukwatsa enkoni y'obukama egi ku ndaarugye aha. Niinyija kukukwatsa egi nkoni y'obukama. N'eyaa. Waareeba? Hati, eki ni kikuru. Musa, nooza kuba omuntu mukuru. Nooza kuba bishop. Nooza kuba eki, kiri, nari ekindi. Otatutsigaho. Guma aha." Kwonka, nooreeba, ekyo akakyeta kikuru, kwonka Ruhanga yaakyeta "ekirikunugwa!"

Hati, bakazi 'mwe muteekateekye okumara akaanya kakye, kandi, naimwe bashaija 'mwe. Eki ensi eyeta kikuru, Ruhanga akyeta "oburofa." Baiburi terikugira ngu, "N'ekihagaro omukazi kujwara kishaija"? Kwonka oteekateeka ngu oboneire waaba nookikora. Waareeba? Nooyoreka omubiri gw'ekikazi ahari sitaane kwonka, kandi nikyo ekyo kyonka. N'ahabw'ekyo, otakikora.

Kandi imwe bashaija 'mwe abarikutuurira ebintu by'ensi, haza mukaramatira kandi mukafumbatira eki! Kandi imwe bashaija 'mwe abataine buanzi oburikugasha kutuma abakazi baanyu n'ebindi baareka kukora ebyo, mwashwara! Haza mweyete batabani ba Ruhanga? Nikireebeka nk'ebitingwa ahariinye. Mwareeba?

Tikubashaasha, kureka n'okubagambira Amazima. Rukundo ehana. Nikwo ekora obutoosha. Omukazi omuzaire otarikufa aha mwana we, kandi akamuhana kandi akamuteera, kandi akatuma yaafayo, tari nyina ekirikugasha. Ekyo kihikire.

65 Hati, reeba ekirikubaho hati. Musa akareeba eki, ababw'okworekwa kwe. Kwonka Faraho yaagira ati, "Eki ni kikuru." Ruhanga yaagira ati, N'ekirikunugwa. "N'ahabw'ekyo Ruhanga . . . Musa akatooranamu eki Ruhanga yaagambire.

Hati, yetegyereze, okwikiriza kureeba eki Ruhanga arikwenda ngu oreebe. Waareeba? Okwikiriza kureeba ebi Ruhanga areeba.

Kandi okuhaajaana n'ebihurikizo bireeba ebi ensi erikwenda ngu oreebe. Yetegyereze okuhaajaana, "Ahabw'enki, n'ekihurikizo ky'obuntu kwonka. N'okuhaajaana kwonka-kwonka ngu n'eki . . . Mbwenu, eki tikiri kirungi nakyo?" Mwareeba? Buzima nikwo kiri, waakoresa ebihurikizo ebyo ebirikuhanisa Ekigambo, mwareeba, n'ahabw'ekyo ebyo nibyo ensi erikwenda ngu oreebe.

Kwonka okwikiriza tikurikureeba ebyo. Okwikiriza kureeba ebi Ruhanga yaagambire. Mwareeba? Nimumanya, murekye okuhaajaana.

66 Okuhaajaana, ekihurikizo ky'okuhaajaana, kireeba eki ensi erikwenda ngu oreebe, ekigombe ky'ediini ky'amaani. Mpaho, ori Omukristaayo? "Oo, ndi-ndi Omupuresibateeri, Omumetsodisiti, owa Luteeri, kandi n'Omupentekoote, n'ebindi. Ndi eki, kiri, nari ekindi." Waareeba, ebyo, ebyo n'ebihurikizo. "Ndi memba w'ekanisa y'okubanza, nooreeba. Oo, ndi Omukatoriki. Ndi-ndi eki, kiri." Waareeba, ekyo nookigamba. Hati, ebyo, ebyo n'ebihurikizo. Nookunda kugamba ekyo ababw'okuba n'ekigombe ky'ediini, ekintu ky'amaani. "Mpaho, twi-twintwaine baamemba baingi, haihi, okukira ekanisa yoona omu nsi, waareeba. Itwe . . ."

Kwonka hariho Ekanisa emwe yonka ey'amazima, kandi Torikugyegaitaho. Noogizaarwamu. Waareeba? Kandi ku oraabe Ogizairwemu, Ruhanga ohuriire naakukoreramu, obwo Arikwemanyisa. Waareeba? Omwo nimwo Ruhanga atuura, omu Kanisa Ye. Ruhanga aza aha Kanisa buriizooba, atuura omu Kanisa. Atuura omuriwi. Ori Ekanisa Ye. Ori Ekanisa Ye. Ori Orusiisira omu Ruhanga atuura. Iwe, niwe Ekanisa ya Ruhanga ohuriire. Kandi Ruhanga ohuriire ku araabe naatuura omu muntu We ohuriire, obwo ebikorwa byawe n'ebya Ruhanga; ku biraabe bitari byo, obwo Ruhanga tarimu. Takaabaasa kutuma waatwaza otyo, kunu Arikugamba omu Kigambo hanu, omuri puraani Ye ngu, "Otakikora," haza okagyenda okakikora. Waareeba, ekyo kigwire. Ku oraakyehakane, obwo ekyo nikyoreka ngu ago Magara omuriwi n'okubamu tigarimu. Waareeba? Ekyo kihikire.

67 Okwikiriza kukeebembera Musa kwamuhitsya omu kahanda k'okworoba. Mwetegyereze, Musa akakora . . . Ngugwo aho Faraho omuto, ngugwo aho Musa muto, bombi baine ogwo mugisha. Musa akareeba okujumwa abantu, ku kuri eitungo ringi okukira byona ebyabaire biri omuri Misri. Kandi we, ababw'okwebemberwa okwikiriza, akakuratira eki okwikiriza kwe kwagambire omu Kigambo, kandi kwamwebembera kwamuhitsya omu kahanda k'okworoba, kandi aha muheru kwamuhitsya omu Kitiinisa, okuba ohuriire ebiro byona, okutafa, omu Maisho ga Ruhanga. Okureeba n'ebihurikizo by'omubiri, bikeebembera, n'eb'y'okweshememeza, bikeebembera Faraho byamuhitsya aha kufa kwe, n'okucwekyerera kwa Misri, eihanga rye, kandi tirikagarukahoga okwiha obwo.

68 Nkikyo aho. Waareeba ahari eki, noofa. Waareeba ahari Kiri, nooba ohuriire. Hati otooranemu. Ekyo nikyo kintu eki Ruhanga yaataire omu maisho ga Adamu na Haawa, omu Kibanja kya Edeni. Mwareeba? Ahabw'okwikiriza, nooteekwa kutooranamu.

Hati mwetegyereze, okureeba kukeebembera Faraho kwamuhitsya aha kufa kwe, hamwe n'okucwekyerera kw'orurembo rwe.

Musa, n'okwikiriza kwe, taratiinire Faraho na kakye. Mwareeba? Tarataire mutima aha bi Faraho yaabaire naagamba. Tarataire mutima ahari Faraho, nk'oku nyina na ishe nabo batarataire mutima aha bikangiso byabo. Musa ku yaahamiibwe ahariwe, kandi akaba ari ogwo owaabaire ari ow'okucungura Misri . . . nimmanyisa kwebembera Israeli kuruga omuri Misri, tarataire mutima aha bi Faraho yaabaire naagamba na kakye. Taramutiinire. Amiina, amiina, amiina! Nimureeba eki ndikumanyisa? [Abateeraine baagira bat, "Amiina." - Omur.]

Omukazi omuzaire otarikufa aha mwana we, kandi akamuhana kandi akamuteera, kandi akatuma yaafayo, tari nyina ekirikugasha. Ekyo kihikire.

69 Mwetegyereze, Musa taratiinire Faraho Ruhanga ku yaaherize kuhamya okwetwa kwe. Musa ku yaikiriize ngu akeetwa ababw'ekyo, kwonka Ruhanga ku yaamugambiire eruguru okwo ati, "Nikwo kiri," reero yaashuumma kandi

Abandi abaatsigara nibagira bat, "Mbweni, hati, obundi naahamanya." Mwareeba?

Kwonka nooteekwa kwemerera kandi oyorekye enyama z'omubiri gwawe. Nikyo ekyo kyonka. Okwikiriza nikukikora.

yaayoreka omu maisho ga Faraho, n'abandi boona, ngu akaba atumirwe kukikora, Musa taratiinire Faraho na kakye.

Yetegyereze, n'obu kiraabe, Faraho akakoresa obwengye bwe ahari Musa. Reeba. Akagira ati, "Mbwenu nkugambire, na-naaza kukora naiwe endagaano." Ku yaaherize kuteerwa ebibonaboneso, yaagira ati, "Naaza kukora naiwe endagaano. Mugyende muramyeo kakye, ebiro bishatu. Mugyende muhikye hare nk'aho, kwonka mutarengaho." Kwonka, nimumanya, e . . . Ebyo n'ebihurikizo by'omubiri bya Faraho ebyamugambiire ekyo, mwareeba, "Mugyende muhikye hare nk'aho, kwonka mutarengaho."

Titwine abantu b'omuringo ogwo ebiro ebi? "Ku oraabe memba w'ekanisa, ekyo ni kirungi."

70 Kwonka, noomanya, okwikiriza oku Musa yaabaire aine kukaba kutarikwikiririza omu diini ya "garukira aho." Akagira ati, "Twena nitugyenda. Nitugyendra kimwe. Ekyo kihikire. Nituza omu nsi eyaaraganisiibwe. Titurikuza aheeru hanu reero tukakora ekigombe ky'ediini, haza tukagarukira aho. Nitugumirizamu kimwe." Amiina. "Ningumizamu ningyenda omu nsi eyaaraganisiibwe. Ruhanga akaturaganisa."

Ka twine Baafaraho baingi ebiro ebi abeemereire aha kituuti, abeebembezi b'ebibiina by'amadiini! "Hati, ku oraakore eki kandi okakora na kiri, nikyo ekyo kyonka. Mpaho, waareeba, ogarukire aha."

Kwonka Musa akagira ati, "Oo, ngaaha! Ngaaha, ngaaha! Ngaaha, ngaaha!" Mwareeba?

Faraho yaagira ati, "Mbwenu, ahabw'enki? Ku muraabe nimuza kugira ediini y'omuringo ogwo, naaza kubagambira eki muraakore, iwe n'abakuru kusha mugyende muramye, waareeba. Iwe n'abakuru kusha mugyende muramye. Habw'okuba, mwena nimubaasa kugira ediini y'omuringo ogwo, kwonka mutagitaasya omu bantu."

71 Nimumanya eki Musa yaagambire? "Nangwa n'ekyara tikiritsigara. Nitugyendra kimwe. Twena nitugyenda! Tinkaagyenda baaba batagyenzire. Kandi, obwire bwona naaba ndi hanu, ndi omu mikono yaawe." Amiina. "Tinkaagyenda kureka nabo baagyenda, kandi nikyo ekyo kyonka." Oo, ka n'omuheereza emanzi! Amiina. "Niinyenda kugyenda nabo. Ahabw'okuba ngu naakitungire, reero nshutame kandi ngire nti, 'Mbwenu, hati, eki ni kirungi?' Ngaaha, sebo. Nitwenda abantu, nabo. Buri omwe omuriitwe naagyenda." Amiina. Yaagira ati, "Titurikuza kutsiga n'obu yaakuba entaama yoona, nari ekintu kyona, enyima. Nangwa n'ekyara tikirikuza kutsigara. Twena nituza omu nsi eyaaraganisiibwe." Amiina!

"Buri omwe omuriitwe! Yaaba ori nyinamaka, nari o-omuzaana muto, nari omukaikuru, nari omutsigazi, nari omugurusu, nari eki ori kyona, nitugyenda, n'obu kiraabe. Tihariho n'omwe omuriitwe orikuza kutsigara." Amiina. "Buri omwe omuriitwe naagyenda, kandi titurikuza kwikiriza ekindi kintu kyona." Ekyo kihikire. Mugyenzi! Ago madiini gakaba nigahakanisana buzima, tikwo? Oo, mugyenzi!

Ngaaha, Musa taraikiririize omu diini egi hanu ya "garukira aho." Ngaaha, egyo akaba atarikugikiririzamu. Ahaa. Eego, sebo. Oo, mugyenzi!

Nitubaasa kurenzya eizooba ryona ahari ekyo, kwonka nintekwa kuhika aha ishomo ryangye ahanyima y'akaanya kakye reero ntandikye kubuurira.

72 Yetegyereze, yetegyereze eki, ka ni kirungi! Oo, eki ninkikunda. Noomanya, aha muheru, Faraho akagira ati, "Mugyende!" Ruhanga akamubonabonesa, n'eiraka rya Musa. Akateera buri kintu kyona. Yaakora buri kintu kyona ekyabaire kiri eky'okukorwa. Yaazibira e . . . yaaraaza eizooba, omu ihangwe. Yaakora ebindi byona. Eihangwe ya-yaarihindura omwirima. Yaareeta ebikyere, emira, enda, n'ebindi byona, omuriro, omwika, n'orufu aha maka ge, n'ebindi byona. Akakora buri kintu okuhitsya obu, aha muheru, Faraho yaagyemirwe kugira ati, "Mugyende! Mutware byona ebi mwine, kandi mugyende." Oo, mugyenzi! Ruhanga ahimbisibwe!

Naashemererwa munonga kumanya ngu omuntu naabaasa kweheerayo kimwe kuheereza Ruhanga okuhitsya obu, sitaane, ataraamanye eky'okumukorera. Ekyo kihikire. Okworobera kimwe Ruhanga okuhitsya obu sitaane yaagizire ati, "Oo, mugyenzi, rugaho! Tindikwenda kugaruka kukihurira." Ekyo kihikire. Noobaasa kukikorera kimwe, buzima.

73 Mwareeba hati, kuri-kuri Ruhanga atarashagikire Musa, obwo akaabaire omuntu w'okushekyererwa. Kwonka Ruhanga akaba ari aho honyini, naahamya. Buri kintu eki yaagambire, kikabaho.

Kandi Faraho akaba naateekwa kurinda ekitiinisa kye, 'habw'okuba akaba ari bishopu, nimumanya, n'ahabw'ekyo a-akaba naateekwa kugumayo. Akaba atarikubaasa kwehakana. Akaba atarikubaasa kugira ati ngaaha, ahabw'okuba kikaba kiriyo nikibaho. Mwareeba? a-akaba atarikubaasa kukyehakana, 'habw'okuba kikaba kiriyo nikibaho. N'ahabw'ekyo aha muheru yaagira ati, "Oo, mwiroko mugyende! Tindikwenda kugaruka kubahurira. Murugye aha! Mutware byona ebi mwine, haza mugyende!" Oo, mugyenzi!

74 Hati nitureeba Musa, hanu, ahanyima ya Ruhanga kumukorera ebintu bingi munonga, kandi akaba amworekire obumanyiso bwingi munonga n'ebi'okutangaaza. Hati, ahabw'edakiika ikumi na itaano eziraakurateho, ka tushoboorore eki hanu. Haza mwetegyereze mufireyo buzima. Musa akahika aha mwanya ogu ahu ya . . .

Ruhanga akaba yaagizire ati, "Ndi hamwe naiwe. Ebigambo byawe n'Ekigambo Kyangye. Nkikuhamiize, Musa. Iwe, obu haabaire hatariho nshohera omu ihanga, bukaba butari bwire bwazo, kwonka okagira oti, 'Enshohera ziije,' kandi enshohera zaija." Okwo n'okuhanga. N'oha orikubaasa kureeta omwirima omu nsi, atari Ruhanga? Akagira ati, "Habeho omwirima," kandi omwirima gwabaho. Waagira oti, 'Habeho ebikyere,' kandi ebikyere nangwa byataaha n'omu nju ya Faraho, omu bitanda, kandi ku baabirundaine omu mituumo mingi. Omuhangi! "Kandi Ngambire kurabira omuriwe, Musa, kandi-kandi naatuma Ekigambo Kyangye kyahanga kurabira omu kanwa kaawe. Buzima nkuhindwire ruhanga omu maisho ga Faraho." Eego, sebo. "Ebi byona Mbikozire."

Kwonka mbaba hanu ku baahikire omu mwanya gumwe, ekigyezo kikye kyaija, reero Musa yaatandika kutaka ati, "Ngire nta?"

75 Niinyenda ngu mwetegyereze. Eri n'eishomo rikuru hanu hati. Eki ninkikunda, mwareeba. Mwareeba, Musa, ku turaashome hanu kurungi, ngu Mu- . . . Abantu, ku baatandikire kutiina, bakareeba Faraho abakuratiire, amaririire kubacwekyereza.

Ruhanga akaba akozire buri kintu kurungi munonga. Hati Akabatandikisa orugyendo rwabo. Yaateeranira hamwe ekanisa. Bakaba beetsirwe kurugayo. Baaruga omuri buri kigombe ky'ediini. Boona baateeranira hamwe. Musa yaagarukayo, kandi yaabuuza ati, "Mukama, nkore ki?"

Akaba agira ati, "Mbwenu, gyenda okore eki." Ni kirungi, gyenda omu maisho. "Hati, Musa, noomanya ngu Nkakweta kukora eki."

"Eego, Mukama."

"Ni kirungi, irooko ogyende ogambe eki, kandi nikiza kubaho," nzizi hanu enshohera zaija. "Gamba eki," kandi nkiki hanu kyaija. "Kora eki," nkiki hanu kyaija. Buri kintu kikaba kiri OKU NIKWO MUKAMA ARIKUGIRA, OKU NIKWO MUKAMA ARIKUGIRA, OKU NIKWO MUKAMA ARIKUGIRA! Hati yaahika omu kabi . . .

76 Reero Ruhanga yaagira ati, "Hati Naabatandikisa orugyendo rwabo. Boona baaherize kwetwa kurugayo. Ekanisa eteeraine hamwe, n'ahabw'ekyo naabahitsya omu rugyendo rwabo. Hati, Musa, beebebere obambutsye seeri. Naakugambira kubambutsya. Naaza kushutama reero mpuumureho omwanya mukye."

Musa yaagira ati, "Ai bambe Mukama, reeba abarikwija, ngugu hanu Faraho yaija! Abantu boona ba . . . Nkore ki? Nkore ki?" Waareeba aho, obwo t'obuntu? Eego, sebo. Yaatandika kutaka naagira ati, "Nkore ki?"

Hanu nitureeba Musa naayorekyera kimwe, obuhangwa bw'omuntu buzima, burijo oyenda ngu Ruhanga akuze enyima reero akutsindikye omu kintu nanka. Hati, abo niitwe ebiro ebi. Nooyenda Ruhanga, ahanyima y'okureeba byona ebi tureebire, kwonka nabwo nooyenda ngu Ruhanga abanze yaakutsindika kukora ekintu nanka. Mwareeba?

Musa akaba atafireyo aho, yaagira ati, "Ruhanga, naaza Kukubuuza, ndeebe eki Oraagambe. Yee, yee, Kigambe. Mpaho, ni kirungi, naanye, ninza kukigamba." Mwareeba?

Kwonka hanu Ruhanga akaba yaamutaireho ahabw'omurimo ogwo, yaahamize ku Ari hamwe nawe. Kwonka ngugu hanu, embeera yaabaho, reero yaatandika kutaka ati, "Nkore ki? Mukama, nkore ki?"

77 Hati nimwijuka, akaba yaaherize kuragura hanu, ahakuba akagira ati, "Abanyamisri aba abu murikureeba eriizooba, timurigaruka kubareeba bundi." Kwonka ahonaaho yaatandika kutaka munonga ati, "Ruhanga, tugire tutu?" Mwareeba? Ahanyima y'okuheza kukora omurimo murungi munonga gw'okuragura aho. Nimureeba, akaba yaaheza kubagambira ekyabaire nikiza kubaho. Ekigambo kya Ruhanga ku kiraabe kyabaire kiri omuriwe, Kikaba kiri omuriwe. Kandi obu yaabaire naakigamba, buzima kikabaho. Eki yaagambire kikaba nikiza kubaho, kwonka ngugu hanu naataka munonga ati, "Ninza kugira nta?"

Oo, obwo ku buraaabe butari obuntu! Ogwo ku araabe atariiinye! Ogwo ku araabe atariiinye! Mwareeba?

Akaba Yaaherize kuhamya ati, "Eki oraagambe nikiza kubaho. Ndi hamwe naiwe."

Mbwenu hanu embeera yaabaho ahonaaho. "Ngire nta? Ngire nta, Mukama? Yaiwe, Mukama, Ori nkahi? Yaiwe, Ompuriire? Nkore ki?" Kandi akaba Yaaherize kumuhamya n'okumworeka, kandi n'okuhamya n'okukora buri kintu naarakira omuriwe. Kwonka hanu ati, "Ruhanga?" Oo, mugyenzi! Naayorekyera kimwe, omuntu naayenda ngu ahuumure reero Ruhanga amutsindikye.

78 Kandi, kunu, akaba naamanya ngu Ruhanga akamushukaho amajuta ahabw'omurimo ogu, kukora eki, kandi Ruhanga akaba yaaherize kuhamya kurungi ebi yaabaire naagamba. Obwire bukaba buhikire bw'abantu kucungurwa. Ruhanga, okurabira omu by'amahano n'eb'yokutangaaza, boona akaba yaabateeraniire hamwe omu kibiina kimwe. Munkuratiire? [Abateeraine baagira bat, "Amiina." -Omur.] Boona akabarundaanira hamwe omu kibiina kimwe, yaahamya ebi yaabaire naagamba. Ebyahandiikirwe nikwo birikugira; hanu hakaba hariho akamanyiso, hanu hakaba hariho ekirikuhamya hanu, buri kintu eki yaagambire. Bwanyima yaabatuuramu nka nabi. Obutoosha, kyona eki yaabaire agamba, Ruhanga akaba akikora, nangwa n'okuhanga kandi akareeta enshohera, n'okutuma ebintu byabaho. Kandi buri kintu eki Yaabaire amuraganiise, hanu Akakikora.

Kwonka akaba naayenda kutegyereza OKU NIKWO MUKAMA ARIKUGIRA. Mwareeba? Akaba ashemereire kumanya ngu okuhamibwa kwonyini kw'okwetwa kwe kukaba kuri OKU NIKWO MUKAMA ARIKUGIRA. Omurimo gwe ogu yaayeteirwe kukora gukaba guri OKU NIKWO MUKAMA ARIKUGIRA. Mwakitunga? [Abateeraine baagira bati, "Amiina."] Ha! Ahabw'enki yaategyereize OKU NIKWO MUKAMA ARIKUGIRA?

79 Akaba naayenda, "Mukama, ngire nta? Hanu naareeta abantu aba aheeru hanu, hare hati. Embeera niyo egi, Faraho arikwija. Boona baaza kufa. Nkore ki? Nkore ki? Ha! Ha!"

Akaba yaaherize kuragura eki baabaire nibaza kukora. Akaba yaaherize kugamba buzima ekyo kyonyini eki, kukikora. Akaragura omuheru gw'eihanga ryonyini eri yaakuriiremu. Nyine amatsiko ngu nimwetegyereza. [Abateeraine baagira bati, "Amiina." -Omur.] Mwareeba? Musa akaba yaaherize kugira ati, "Timurigaruka kubareeba bundi. Ruhanga naaza kubacwekyereza. Babashungiise munonga ekirkugasha. Ruhanga naija kubacwekyereza." Akaba yaaherize kuragura ekyabaire nikiza kubabaho.

Bwanyima ati, "Mukama, nkore ki?" Nooreeba obuhangwa bw'omuntu aho? Waareeba? "Nkore ki? Naaza kutegyereza OKU NIKWO MUKAMA ARIKUGIRA." Eego, sebo. "Naaza kureeba eki Mukama araagambe, reero nkikore." Haa!

Ijuka, hakaba heemire Faraho owaabaire atarikumanya Yosefu, noomanya, obwire obwo, omu bwire obwo bwonyini. Waareeba? Waareeba? Reero Musa yaayemerera buzima kandi yaaragura omuheru gw'eihanga eryo.

80 Mbwenu ngugu hanu aha mwanya gwonyini ahu kyabaire nikiza kuba, kwonka yaataka ati, "Nkore ki, Mukama? Nkore ki?" Mwareeba? Obwo t'obuntu? Obwo t'obuhangwa bw'omuntu? "Nkore ki?" Haa!

Akaba yaaherize, kuragura. Ruhanga akaba yaahaire ekitiinisa buri kintu eki yaabaire agambire, kandi akaba ayeteirwe omurimo ogwo, mbwenu ahabw'enki yaagizire ati, "Nkore ki?" Hakaba hariho ekyetengo; bukaba buri obujunaanizibwa bwe kukigamba. Ruhanga akaba naayenda ngu Musa, akozese ekyo kiconco ky'okwikiriza, eki Yaabaire amuhaire. Ruhanga akaba yaaherize kukihamya. Gakaba gari Amazima. Mbwenu Ruhanga akaba naayenda ngu Musa, akaba naayenda ngu abantu bareebe ku Ari hamwe na Musa.

Kandi we, enyima okwo, akategyereza, yaagira ati, "Hati, Mukama, ndi omwereeere. Ngambira hati."

"Yee, ninza kugyenda nkore eki. Nyine OKU NIKWO MUKAMA ARIKUGIRA."

"Ow'eishe-emwe, ekyo ni OKU NIKWO MUKAMA ARIKUGIRA?"

"Eego, eego," Ow'eishe-emwe Musa, "ekyo ni OKU NIKWO MUKAMA ARIKUGIRA. Yee."

"Kare, twakitunga hati, OKU NIKWO MUKAMA ARIKUGIRA." Kandi kyabaho. Tikikaremwaga n'omurundi na gumwe. Tikikaremwaga na kakye.

Kandi nkiki hanu omu mirabanamu, kyagaruka kyabaho. Hati Amuhikize omu rugbyendo. Ekanisa yaaherize kwetwa kurugayo, abahikize omu rugbyendo, kandi bariyo nibagyenda. Kwonka Musa yaatandika kutaka ati, "Mukama, ni OKU NIKWO MUKAMA ARIKUGIRA? Nkore ki?" Kare.

81 Ruhanga akaba naayenda ngu Musa agire okwikiriza, oku Yaabaire atairemu, omu kiconco eki Yaabaire aherize ku-kuhamya kurungi. Ruhanga akaba buzima yaaherize kuhamiza Musa hamwe n'abantu ngu akaba Ariwe, kurabira omu Kigambo kandi n'okurabira omu bintu ebyabaire nibigambwa bikabaho. Kikaba kyorekirwe kurungi. Kikaba kitarikumwetaagisa kwemerereza omutima aharikyo na kakye. Mwareeba? Kikaba kitarikumwetaagisa kukiteekateekaho ekindi kintu kyona, ahabw'okuba kikaba kyahweire. Akaba yaaherize kukora ebintu ebi. Kandi akaba yaaherize kuhamya, okurabira omu kugamba ebintu bikahangwa, nk'enshohera n'emira, ngu Ekigambo kya Ruhanga kikaba kimurimu.

Mbwenu hanu yaaza kubuza hati eky'okukora, obwo emirabanamu emuri omu maisho. Mwareeba? Oo, mugyenzi!

Nyine amatsiko ngu eki nikishuumira kimwe kituhikaho, kandi nitubaasa kureeba ahu turi. Mwareeba? Ekyo tikirikutuma waayehurira ori muhango otyo" [Abateeraine baagira bati, "Amiina." -Omur.] Kuteekateeka ahari Musa n'okugamba enhobe ze, haza tukareeba ezaitu. Yee. Mwareeba?

82 Akaba ari aha, ayemereire aho, mwareeba, akaba naamanya ngu Ebyahandiikirwe bikagamba ngu egoyi niyo yaabaire eri eshaaha n'ekiro ky'ebyo kubaho, kandi akaba naamanya ngu Ruhanga akaba amubugaine omu Nyomyo y'Omuriro. Kandi Ekashuumira kimwe omu maisho g'abantu kandi yaakora eby'amahano ebi. Kandi buri kintu eki yaagambire, kikabaho, nangwa n'okuhanga ebintu. Naakora ebintu ebi Ruhanga wenka arikubaasa kukora, arikworeka ngu eiraka rye rikaba riri Eiraka rya Ruhanga.

Kandi hanu omurabanamu gwabaho omu bantu abo abu yaabaire naayebembera, naatwara omu nsi eyaaranisiibwe, kwonka yaayemerera, naataka ati, "Nkore ki?" Ogwo n'omuntu, orikwenda ku . . .

Nk'Ow'eishe-emwe Roy Slaughter, niinyikiriza ngu ashutami aheeru y'omuryango aho, rimwe akangambira, aha muntu owaabaire nankorera ekintu nanka. Reero naagira nti, "Mpaho, nkakora eki, mbwenu hati n'ekyo."

Yaagira ati, "Ow'eishe-emwe Branham, barekye beegamire eibega ryawe eriizooba, reero nyencakare obaheekye." Kandi okwo nikwo abantu bari. Beegamire eibega ryawe eriizooba, reero nyencakare noobaheeka.

Nikyo ekkyo, ekkyo nikyo Musa yaabaire naakora. Kikeetaagisa Ruhanga kumuheeka ahanyima y'Okumutuma kandi akakihamya kukikora. Kandi abantu bakaba bashemereire kugira bati, "Musa, gamba ekigambo. Nkakureeba nookikora kuri. Ruhanga akakuhurira kuri, kandi okiri omuntu ogwo omwe n'eriizooba." Amiina. Mwareeba? "Kikore!" Amiina. Akaba ashemereire kuba naakimanya, kwonka tarakimanyire. Kare. Nk'oku kyabaire kiri buriya, nikwo kiri na hati. Ekyo, nitukireeba. N'ahabw'ekkyo Yaagira ati, "Mu- . . ."

83 Nikiteekwa kuba kyaruhize Ruhanga. Ruhanga naateekwa kuba yaatamirwe ekkyo. Yaagira ati, "Ahabw'enki Nontakira? Tinaaherize Kweyoreka eki ndi? Tinaakugambiire nti Nkakutuma kukora omurimo ogwo? Tinaakugambiire kugyenda kukora eki? Tinaaraganiise ngu eki Ndyakikora; ngu Ndyaba ndi hamwe n'akanwa kaawe, kandi ngu Ndyagamba nindabira omuriwe kandi ngu Ndyakora eki, kandi ngu oryayoreka obumanyiso n'eb'y'okutangaaza? Tinaaraganiise kukikora? Buzima tikwo nkozire, kandi nkacwekyereza buri muzigu okwehinguririize? Mbwenu ori aha oyemereire aheeru aha hati, aha Nyanja Erikutukura, ori aha murimo gwawe buzima, ogu Naakugambiire kukora, kwonka na hati nookiborooga kandi Nontakira. Torikuunyikiriza? Torikureeba ku Naakutumire kukora eki?" Oo, obwo ku buraaabe butari obuntu! Mugyenzi! N'ahabw'ekkyo Nikiteekwa kuba Kyamutamire munonga.

84 Kandi Yaagira ati, "Noomanya ngu nookyetenga. Noomanya ngu nooza kutwara abantu aba omu nsi egyo eyaaraganisiibwe. Ekyo nikwo kiri buzima. Onyigiiwe hanu omu nshonda. Tihariho ekindi kyona eki orikubaasa kukora. N'ahabw'ekkyo hariho ekyetengo. Ahabw'enki nontakira? Nonsheruraho ki? Ahabw'enki Nonyeta? Tinkihamiize abantu? Tinkikuhamiize? Tiinye mbireetsire? Tikiri omu Byahandiikirwe? Tinaaraganiise kutwara abantu aba omuri eggo nsi? Tinaakwetsire kandi Nkakugambira ngu Ndyakikora? Tinaakwetsire kandi Nkakugira nti Naakutuma kukikora, ngu tariiwe, kureka Niinye? Kandi ngu Niinyija kushuma kandi Mbe hamwe n'akanwa kaawe, kandi kyona eki origamba, Ndyakyoreka kandi nkikhamye. Tinkikozire?"

"Kwonka, akantu kakye koona ku karikubaho, ahabw'enki nootwaza nk'omwerefere? Oshemereire kuba omushaija. Gambira abantu," amiina, "bwanyima mugumizemu mugyende!" Amiina. Nikyo ekkyo. "Reka kutaka. Gamba!" Amiina. Oo, ekkyo ninkikunda. "Ahabw'enki Nontakira? Gambira abantu kwonka reero ogumizemu ogyende aha kigyenderererwa kyawé. Eki kiri kyona, ku buraaabe buri oburwaire, nari kyona eki kiri, okuzoora abafu, nari kyona eki kiri, gamba! Naaherize kukihamya. Gambira abantu."

85 Ka n'eishomo! Ka n'eishomo, oo, mugyenzi, omuri eki kicweka ky'orugyendo ahu twahika. Reeba ahu turi hati, eego, sebo, omu Kukurura kwa Kashatu. Yetegyereze, turi hanu aha rwigi honyini, rw'Okwija kwa Mukama.

Akaba ashukirweho amajuta ahabw'omurimo ogwo, kwonka nabwo akaba akitegyereize OKU NIKWO MUKAMA ARIKUGIRA. Nikiteekwa kuba kyaruhize Ruhanga. Yaagira ati, "Otagaruka kutaka. Gamba! Nkakutuma."

Ai Ruhanga, oku Ekanisa egi eshemereire kuba eri akasheeshe aka! N'okuhamya kwa Ruhanga okuhikiire kimwe, n'Enyomyo y'Omuriro hamwe n'obumanyiso n'eb'y'okutangaaza, buri kimwe oku kyabaire kiri omu biro bya Sodoma. Akagira ngu biryagaruka bibevo.

Ngigi hanu ensi omu mbeera yaayo. Ndiryo eihanga omu mbeera yaaryo. Mbabo abakazi omu mbeera egyo. Mbabo abashaija omu mbeera egyo. Ngigyo ekanisa omu mbeera egyo. Buri kintu nkikyo aho. Eby'omu mwanya ahaiguru, obumanyiso, endegye z'omu kaabunga ezitarikwetegyerezibwa na buri kintu ky'omu mwanya ahaiguru, kandi n'ebintu by'emiringo yoona ebitarikwetegyerezibwa, n'okuhoorera kw'enyanja, ebingonzi by'amaani, abantu okuhahaaza emitima, obwoba, obwire bw'okushoberwa, emihondano rwagati y'amahanga, ekanisa kutaana na Ruhanga.

86 Kandi n'omuntu ogwo omugomi naimuka, oyetunguura ahaiguru ya byona; orikwetwa Ruhanga, ogwo oshutama omuri hekalu ya Ruhanga, naayeyoreka we wenka, oo, mugyenzi, kandi kihikire omu ihanga eri. Kandi ekanisa eyekoziremu ekibiina ky'ediini, kandi boona beeteeraine hamwe, nka baamaraaya aha nshambani, kandi na buri kintu buzima omu buryo bw'obwamaraaya.

Obwamaraaya, niki? Kugambira abakazi ngu nibabaasa kushara eishokye ryabo, kugambira abakazi ngu nibabaasa kujwara ebijwaro bigufu munonga, kugambira abashaija ngu nibabaasa kukora eki kandi ngu nibabaasa kukora kiri; kandi n'ababuurizi, nibakora eki, kandi n'engiri y'okuba bamwe n'ebindi. Timurikureeba, n'okushambana n'Ekgambo kya Ruhanga ky'amazima!

Kandi Ruhanga atwoherereize Ekigambo Kye ky'amazima, kitaine kakwate n'ekigombe ky'ediini, Kitatairweho amaremesa, kandi yaatuha Enyomyo y'Omuriro, Omwoyo Orikwera otwire hamwe naitwe okumara emyaka makumi ashatu hati. Kandi buri kintu eki Yaaragwire kandi akagamba, kibaireho buzima nk'oku Yaakiragwire.

87 Gambira abantu, reero tugumizemu tuygende omu maisho. Amiina. Twine ekigyenderererwa, ekkyo n'Ekitiinisa. Ka tugumizemu Tukihikyeho. Nituza omu Nsi eyaaraganisiibwe. "Byona nibibaasika ahari abo abarikwikiriza." "Gambira abantu. Tinkihamiize? Nangwa Tinyikiriize n'ekishushani Kyangye kikateerwa ndi omuriimwe, n'ebindi byona, kandi nkakora na buri kimwe ekirikubaasa kukorwa, kuhamya ngu Ndi hamwe naimwe? Obutabo

bw'amahurire, saabiiti nkye ezihingwire, tiburahandiikirwemu ekintu ekyo, obu waagambira hanu aha kituuti ekyabaire nikiza kuba aheeru hanu, kandi emyezi eshatu ekyo kitakabaireho, kandi kyabaho kandi kyahamibwa? Nangwa na saayansa neekimanya. Kandi na buri kintu eki Nkozire, kwonka na hati okitegyereize. Gambira abantu kandi mugumizemu mugyende omu maisho aha kigyendererwa kyanyu." Amiina.

Nasani taragambire Daudi? Nasani, nabi, ekiro kimwe ashutami, naareeba Daudi omugabe oshukirweho amajuta, akagira ati, "Kora ekikuri aha mutima kyona, ahakuba Ruhanga ari hamwe naiwe." Yaagambira Daudi ati, "Kora ekikuri aha mutima kyona. Ruhanga ari hamwe naiwe."

88 Joshua akaba ashukirweho amajuta kukubuura ensi ahabwa Ruhanga hamwe n'abantu be. Eizooba rikaba rigufu. Akaba naayetenga obundi bwire ahabw'omurimo ogwo ogu yaabaire ashukiirweho amajuta kandi atumirwe kukora. Joshua, omuntu, akaba ashukirweho amajuta. Ruhanga akamugambira ati, "Nk'oku naabaire ndi na Musa, nikwo ndikwija kuba naiwe." Amiina. "Egyo nsi, naaza kugibaha. Kandi niinyenda ngu ozeyo kandi omariremu kimwe Abamaleki, na-n'Abahi- . . . N'abandi boona-boona, Abafelistia hamwe-hamwe n'Abaperizi, kandi n'abandi boona abatari bamwe, obamariremu kimwe. Ndi hamwe naiwe. Niinyija . . . Tihariho omuntu orikuza omu kas, ebiro byona eby'amagara gaawe. Tihariho omuntu orikubaasa kukuteganisa. Gumizamu ozeyo."

Reero Joshua yaasyorayo rurara egyo kandi yaagira ati, "Munkuratire!"

Reero yaahikayo, kandi ngugu hanu naarwana. Kandi kikaba kiri ki? Akatuntumura omuzigu. Bakaba bari obubiina bukye hanu n'obubiina bukye hari. Ekiro ku kiraahikye, boona bakaba nibaza kweteerana hamwe kandi bakora eihe rimwe ry'amaani, reero baija n'eihe rihango kumurwanisa. Kandi eizooba rikaba nirirengarenga. Akaba naakyetenga omushana. Eizooba rikaba nirirengarenga. Taratsimbire amaju ge kandi akagira ati, "Mukama Ruhanga, nkore ki? Nkore ki?" Akagamba! Akaba aine ekyetengo. Yaagira ati, "Iwe izooba 'we, yemerera!" Taratakiire ekintu kyona. Akaragiira ati, "Iwe izooba 'we, yemerera! Nyine ekyetengo ky'eki. Ndi omuheereza wa Mukama, oshukirweho amajuta ahabw'omurimo ogu, kandi nyine ekyetengo. Yemerera, kandi reka kwaka . . . Naiwe, kwezi 'we, yemerera ah'ori," okuhitsya obu yaarwaine orugamba akasingura kandi akabacwekyerereza kimwe. Kandi izooba rikamworobera.

89 Hatariho okutaka kwona. Akagambira eizooba, yaagira ati, "Yemerera. Iwe izooba 'we, yemerera aho! Naiwe, kwezi 'we, guma ah'ori." Taratakire ati, "Mukama, hati nkore ki? Nyongyera omushana gw'eizooba." Akaba naayetenga omushana gw'eizooba, n'ahabw'ekyo yaaguragiira, kandi eizooba ryamworobera. Oo, mugyenzi! Akaragiira eizooba kwemerera.

Samusooni, ashukirweho amajuta, akaimukaho, atoorainwe Ruhanga, yaaheebwa ekiconco ky'amaani, akaba atairweho kucwekyereza ihanga ry'Abaclistia. Ashoroirwe, azairwe omu nsi, Ruhanga amushukireho amajuta, okucwekyereza Abafelistia. Kandi ekiro kimwe bakamukwatira omu musiri, ataine rurara ye, ataine eicumu. Reero Abafelistia rukumi baine eby'okurwanisa baamugwaho omurundi gumwe. Akagwa ahansi reero yaagira ati, "Ai Mukama, ntegyereize okworekwa? Ai Mukama, nkore ki? Hati nyoreka eky'okukora"? Akaba naamanya ngu aine ekyetengo. Taraboine ekindi kyona kureka eigufa ry'oruba orukuzire rw'enyumbu, kandi yaaruteeza Abafelistia rukumi yaabarambika ahansi. Amiina!

Taratakiire Ruhanga. Akakozesa ekiconco kye ekishukirweho amajuta. Akaba naamanya ngu akatumwa ahabw'omurimo ogwo. Akaba naamanya ngu ekyo nikyo yaazaariirwe. Akaba naamanya ngu akaba ashukirweho amajuta n'ekiconco, n'ahabw'ekyo yaateera yaarambika ahansi Abafelistia rukumi. Taratakiire Ruhanga. Ruhanga akamushoroora kandi yaahamya ku ariwe, ahabw'ebindi bintu ebi yaabaire akozire. Kandi akaba ari omuheereza wa Ruhanga oshukirweho amajuta, ohamiibwe, kucwekyereza Abafelistia, kandi akakikora. N'obu embeera zaabaire ziri zita, akakikora. Tarashabire na kakye. Ogwo gukaba guri omurimo gwe. Ekyo, Ruhanga akaba naamukoreramu; yaajakura eigufa eryo ry'oruba rw'enyumbu reero yaatandika kuteera Abafelistia. Oku e . . .

90 Ahabw'enki, okuteeza ekyo kintu omurundi gumwe, ahari ezo nkofira z'emiringa z'omuzimba gwa inci emwe n'ekicweka z'okurinda empanga nka batyo, zikaacwanyagwire eryo eigufa riba obucwekacweka miriyoni. Kwonka akateera yaarambika ahansi rukumi aharibo, kandi yaabaita, kandi nabwo yaaguma ayemereire naryo omu ngaro ze.

Tarabuurize kibuuzzo kyona. Taratakire. Akagamba. Yaabatuntumura. Oo, mugyenzi! "Okusingura Abafelistia, Mukama, nimbaasa kusingura Abafelistia? Ni-nimmanya ngu Okantuma kukikora, Mukama. Eego, Mukama, nimmanya ngu Okantuma kucwekyereza eri ihanga ry'Abaclistia. Mbwenu hanu, rukumi baanyetooroore, kandi tinyine ekintu kyona. Naaza, hati naaza kukora ki, Mukama?" Oo, mugyenzi! Tihariho ekintu ekirikuza kumuteganisa. Ashukirweho amajuta ahabw'omurimo ogwo. Tihariho ekintu kyona ekirikuzaa kukukora kubi. Ngaaha, nangwa na kimwe. Haleluya! Akakwata eki yaabaire aine reero yaabateera. Ekyo kihikire.

91 Abazigu ku baamukingiraine omunda, baagira bat, "Hati twamukwatira omu kishengye, tumwine hati. Twamukwatira omunda hanu n'ogu mukazi. Hati orwigi turukingire, hoonahoona okwehinguririza, kandi tarikubaasa kushohora. Tumwine."

Samusooni taratakire ati, "Ai Mukama, bangoteire omuri eki kigombe ky'ediini." Ha! "Aa, naaza kukora ki?

Nyegaitsire hamwe nabo. Naaza kukora ki?" Ekyo tarakikozire na kakye.

Akafa kushohora, kandi yaakuura orwigi rw'eirembo, kandi yaaruta aha ibega rye, reero yaarutwara. Amiina! Akaba ashukirweho amajuta ababw'omurimo ogwo. Akaba ayetsirwe Ruhanga. Tibaramukingirainemu. Ngaaha, buzima! Akatwara ezo nyigi z'amarembo. Ekyo Tarakishabiire. Tarabuurize Ruhanga yaaba akikora nari atakikora. Nigwo gwabaire guri omurimo gwe buzima. Amiina, amiina, amiina! Ari aha murimo gwe buzima. "Ahabw'enki Nontakira? Gamba, reero ogumizemu!" Amiina! "Reka kutaka. Gamba!" Akaba yaarekire okunwigiira n'okuniagiira hati. Ashemereire kuba omuntu mukuru orikubaasa kugamba. Ekyo kihikire. Akaba naamanya ngu ekiconco kye ky'amaani ekishukirweho amajuta kikaba nikibaasa kucwekyereza Omufilistia weena owaabaire naamwemerera omu maisho. Amiina.

92 Kwonka ekyo titurikukimanya, nimureeba. Tukiri abeereere, n'akacupa k'amate eri omu kanwa kaitu.

Akakimanya, akaba naamanya ngu Ruhanga akamwimutsya ababw'ekigyendererwa ekyo, n'ahabw'ekyo hakaba hatariho ekintu kyona ekyabaire nikiza kumuza omu kasu, ebiro byona by'amagara ge. Tihariho ekintu kyona ekyabaire nikibaasa kumucwekyereza. Akaimukibwa ababw'ekigyendererwa ekyo, nka Musa. Tihariho ekintu ekirikuza kumwemereza. Tihariho Abaamaleki nari ekindi kintu kyona ekirikubaasa kumwemereza. Ari omu rugyendo naaza omu nsi eyaaraganisiibwe. Samusooni akaba naamanya ngu ari omu rugyendo.

Yoshua akaba naamanya ngu naaza kukubuura ensi. Akaba ahamiibwe. Ekigambo kya Ruhanga kikakiraganisa, kandi n'Omwoyo Orikwera akaba ari aho naakihamya.

93 Akaba ari omu rugyendo rwe, n'ahabw'ekyo hakaba hatariho ekintu kyona ekirikuza kweikiika omu muhanda gwe. Ngaaha, sebo. Ari aha murimo gwe buzima, hamwe na Ruhanga, hakaba hatariho ekintu kyona ekirikuza kweikiika omu muhanda gwe. N'ahabw'ekyo akakuura ezo nyigi z'amarembo reero yaazita aha mabega ge, niziremeera nka zaakilo enkumi ina nari itaano, reero yaazitwara aha mutwe gw'ekibungo kandi yaazishutamaho. Tihariho ekintu kyona ekirikuza kwemerera omu muhanda gwe. Akaba aine ekiconco ekishukirweho amajuta kuruga ahari Ruhanga. Kikaba kitarikumwetaagisa kutaka ati, "Mukama, nshemereire kukora ki hati?" Akaba yaaherize kushukwaho amajuta kukikora. Ekyo kikaba kiri OKU NIKWO MUKAMA ARIKUGIRA, "Bacwekyereze!" Haleluya! "Bacwekyereze! Nkakutaho ababw'ekigyendererwa ekyo." Amiina.

"Nkore ki, Mukama? Aa, naaza kukora ki hanu aha Nyanja Erikutukura?"

"Tindakugambiire ngu Nkakuha orushozi nk'akamanyiso ebiso hanu? Nooza kugaruka aha rushozi orwo, kandi nooza kutwara abantu aba omuri egoo nsi. Tindakwetsire ababw'ekigyendererwa ekyo? Ahabw'enki nooyemereza omutima ababw'ekintu kyona ekiraayekiike omu muhanda? Gamba, kandi otandikye kugyenda!" Amiina kandi amiina! "Yee, Nkakweta ababw'ekigyendererwa eki."

94 Daudi, akaba naamanya ngu akashukwaho amajuta, kandi yaahamibwa kuba omuteebi murungi. Akaba naamanya ngu nibamanya ku n'omuteebi murungi. Daudi akaba ashukirweho amajuta. Akaba naakimanya. Kandi ku yaayemereire omu maisho ga Goliasi, taratakire ati, "Ai Ruhanga, nkore ki hati? Rindaho, nshe-nsheme . . . nimmanya ebi Waakozire omu bwire obwahingwire. O, Okatuma naita edubu, kandi Waatuma naita entare. Kwonka shi Goliasi ogu ebiso kuri mugire nta?" Ha! Ekyo tarakikozire. Akagamba kwonka. Akagamba ki? "Nooza kuba nk'oku baabaire, omu maisho gaawe." Akagamba kandi yaagyenda omu maisho.

Tarashabire shaara yoona. Tarahaireyo ekitambo kyona na kakye. Akaba naamanya ku ashukirweho amajuta. Amiina. Akaba ashukirweho amajuta, kandi na kaaturi egoo ekaba yaahamibwe ku ni nungi. Akaba aine okwikiriza omu kushukwaho amajuta kwe. Akaba aine okwikiriza ngu Ruhanga akaba naabaasa kuhabura eryo eibaare rikateebera kimwe rwagati y'egoo nkofiira y'ekyoma aho, aha mwanya gwonka ogwabaire nigubaasa kuteerwamu. Akaba ayemereire aho.

95 Akaba naamanya ngu n'omuteebi murungi. Amiina. Akaba naamanya ngu Ruhanga akamukora ekyo. Amiina. Akaba naamanya ngu akaita entare, akaba naamanya ngu akaita edubu, kwonka ebyo bikaba bikwatsire aha itungo rya ishe w'omu nsi. Eri hanu n'eitungo rya Ishe w'omu Iguru! Amiina. Taragwire ahansi akagira ati, "Nshemereire . . . Nshemereire kukora ki hati, Mukama?" Akagamba kandi yaagira ati, "Noija kuba nk'egyo ntare n'edubu, kandi reeba naija." Amiina! Ruhanga aheebwe ekitiinisa! Eego, sebo. Akagamba kandi yaagyenda omu maisho kubugana Goliasi ogu. Oo, mugyensi!

Tarafireyo aha kingano kye! Akaba ari omutsigazi muto, orikwera, nimumanya. Akaba atari muhango munonga. Akaba ataboneire munonga w'okureebwa, ari nk'omuntu mukye oruhire kandi apeeruukire. Baiburi neegira ngu akaba naayera. Hati, obwo otafireyo aha kingano kye hamwe n'ekibarikweta okubaasa kwe kw'okukikora.

Noomanya, bi-bishopu akamugambira, yaagira ati, "Hati reeba hanu, mutabani, oriya mushaija n'otendekirwe eby'ediini. Waareeba, n'omurwani. Akazaarwa ari omurwani kandi ni . . . Atuura ari omurwani, okwiha omu buto bwe; mbwenu tokaamubaasa." Reero bakuru be baamugira bat, "Oo, iwe munyamaryo 'we. Ekyo nikyo kyakureeta hanu, garuka omu ka."

Ekyo tikiramuteganiise. Ahabw'enki? Akaba naamanya ngu akashukwaho amajuta. "Ruhanga owaanjunire

entare, Ruhanga owaanyihire omu byara by'egyo dubu, Naija kunjuna n'okukiraho, oriya Mufilistia. Reeba naija. Ninkubugana omu Iziina rya Mukama Ruhanga wa Israeli." Amiina. Tarashabire munonga; akaba yaaherize kushaba munonga. Ruhanga akaba yaamushabiire munonga omusingye gw'ensi gutakatairweho. Akaba ashukirweho amajuta ababw'omurimo ogwo. Akaba ashemereire kugamba reero akagyenda omu maisho. Nikyo ekyo kyona ekyabaire kishemereire kukorwa, kugamba kwonka reero akagyenda omu maisho. Oo, nikyo ekyo kyona ekyabaire nikyetengwa. Oo! Tara . . .

96 Ekikwatsire aha b'eishe-emwe bagyenzi be b'ebigombe by'amadiini, abo baganiizi beemereire aho, nabo, nimumanya. Oo, eego. Bakaba beemereire aho nibagamba, nibaganiiza kandi nibashungisa, kandi nibagira . . . Beene ishe, nimumanya, kandi baagira bat, "Aa, aa, aa, torikubaasa. Iwe, oine amaryo kusha." Ekyo tikiramutetemeise na kakye. "Nooyenda kuba ow'omutaano aha bandi. Nooyenda kwehurira kwonka." Kuri okwo kwabaire kuri okwehurira, kukaabaire kwo. Kwonka baakareebera orubaju rw'obwengye rw'obuntu rwonka.

Daudi akamanya ngu amajuta g'okushukwaho gakaba gamuriho. Amiina. Tikirareetsireho ntaaniso yoona ahariiwe. Akagira ati, "Ogwo Mufilistia naija kuba nk'egyo dubu n'entare, n'ahabw'ekyo reeba naija." Akakiragura kitakabaireho. Akakora ki? Akaita edubu. Yaita entare. Yaahonda entare ahansi na . . . Naki? Na-na kaaturi, reero yaakwata omusyo, na bwanyima edubu. Entare, entare akagiitisa omusyo. Ekyo nikyo kintu kimwe eki yaakozire Goliasi. Akamutuura ahansi n'eibaare, reero yaasyorayo rurara ye, kandi yaagitemesaho omutwe gwe, aho aho omu maisho gaabo. Akaragura ki kitakabaireho? "Kandi naiwe noiija kuba nkabyo." Ahabw'enki? Akagamba ekigambo ngu nikiza kubakwo, reero yaagyenda omu maisho kutuma kyahikiirira. Amiina. Oo, ow'eishe-emwe! Akagamba, kandi yaategyecka embeera ekiro ekyo.

97 Ku haraabe harabaireho obwire obu omuntu ashemereire kugamba, ni hati. Nimpendera, omu dakiika nkye eziraakurateho ku mwakubaasa kugumisiriza ezindi dakiika nkye. Nyine ebidi bintu ebi mpandiikire hanu, Ebyahandiikirwe ebi ndikwenda kuhikaho.

Petero taratakire, ku yaaboine omuntu owaabaire aine okwikiriza okurikugasha kutambirwa, abyami aha irembo erirkwetwa Erirungi. Taratsimbire amaju reero ngu ashabe ekiryo kyona, kandi, nari okushaba kw'eizooba ryona, okushaba kuraingwa, n'amaani, reero ngu agire ati, "Mukama, Ninkushaba hati ngu Ohwere omuntu ogu enshoberwa oremaire. Nindeeba ngu aine okwikiriza. Nimmanya ngu n'omwikiriza. Kandi naamubuuza, kandi ya-ya . . . Na-na-na . . . Yaagira ngu aine okwikiriza, naaza kwikiriza ebi ndaamugambire. Kandi naamugambira ebikwatsire aha . . . ebikwatsire aha bi Waakozire, kandi ni-nintekateeka hati, Mukama, ngu-ngu . . . Noobaasa kumpa OKU NIKWO MUKAMA ARIKUGIRA ahabwe?"

Ngaaha, akaba naamanya ngu n'entumwa eshukirweho amajuta. Akaba naamanya ngu Yesu Kristo akamutuma. Ati, "Mukize abarware, muzoore abafiire, mushemeze ababembe, mubingye baadaimoni. Mukaheerwa busha, naimwe muheere busha." Akagira ati, "Petero, gyenda okore ekyo!" Tikiramwetaagiise kushaba munonga. Akaba atumirwe.

98 Akagira ata? Akagira ati, "Omu Iziina rya Yesu Kristo!" Akagamba Eiziina rya Yesu Kristo, kwonka ogwo mushaija yaaguma abyami aho. Reero yaamukwata omukono yaamwimutsya, kandi yaagira ati, "Yemerera aha maguru gaawe!" Kandi yaamukwatinira aho kuhitsya obu amagufa g'obugombamburi bwe gaatungire amaani, reero yaatandika kugyenda. Ahabw'enki? Taragizire oruteerane rw'okushaba kw'ekiryo kyona. Taratakiire Ruhanga. Akaba naamanya hatariho kubanganisa, okuruga omu kanwa ka Yesu Kristo, ku yaabaire ashukirweho amajuta ababw'omurimo ogu. Yee. Akagamba kandi yaamwimutsya, ahakuba akaba naamanya ngu n'entumwa eshukirweho amajuta ababw'ekigyendererwa ekyo.

Abantu abaabyamire omu kicuucu kye tibaragizire bat, "Oo, ija, entumwa Petero, reero otakire ahaiguru yaitu, kandi otushabire okushaba kw'okwikiriza, ahari Ruhanga." Ngaaha, ngaaha, ekyo tibarakigambire na kakye. Bakaba nibamanya ngu akashukwaho amajuta kandi n'entumwa ya Ruhanga ehamiibwe. N'ahabw'ekyo bakagira bat, "Ka tubyame omu kicuucu kye.

Tikirikukwetaagisa kugamba ekigambo kyona. Nitukimanya. Nitukiikiriza. "Amagara agaabaire gari omuribo! Egyo ntumwa ekaba etarikubaasa kubahikaho boona. Kandi bo, bonka, n'ekicweka kyabo.

99 Musa akagira ati, "Tiinye nyenka oraagyende. Twena nitugyenda." Twena twine ekintu ky'okukora. Twena nituteekwa kushukwaho amajuta.

Kandi bakareeba egoo ntumwa eyemereire aho, kandi baamureeba naakiza omuntu orwaire kandi naakora ebintu ebi yaakozire. Baamanya ngu akaba atarikuza kubahikaho. Bati, tibaragizire ngu, "Petero, ija kandi-kandi otushabire, kandi otegyereze hati okuhitsya obu oraatungye OKU NIKWO MUKAMA ARIKUGIRA, reero oije ongambire. Tureebe eki Mukama arikugamba." Bakagira bat, "Kuri nitubaasa kubyama omu kicuucu kye, ababw'okuba Ruhanga wenyini owaabaire ari omuri Yesu Kristo ari omuriwe, kandi nitureeba ekintu nikyo kimwe nikikorwa. N'ahabw'ekyo baawkata aha mukugiro gw'ekijwaro kya Yesu kandi baabyama n'omu kicuucu Kye, kandi Yesu ari omuri ogu mushaija. Ekyo kicuucu ku kyakubaasa kutuhikaho, nitukira."

Kandi Baiburi neegira ngu boona bakakira. Hatariho oruteerane rw'okushaba ekiryo kyona, barikugira ngu, "Mukama, nze kubyama omu kicuucu ky'egi ntumwa?" Ngaaha, bakaba nibakimanya. Omushana gukaba

gubajwereire. Emitima yaabo ekaba ejewire. Okwikiriza kwabo kukaba nikukora. Amiina. Bakakiikiriza. Bakaba baakireebire. Ebitambaara bya Paulo, omuringo nigwo gumwe.

Hati, omu kuhendera.

100 Yesu taratakire ku Baamureeteire omwojo w'omushazi, owaabaire naagwa entsimbo, naagwa omu muriro. Taragizire ati, "Taata, Ndi Omwana Waawe, kandi hati Okantuma hanu kukora eki n'eki, hamwe n'eki. Nkize omwojo ogu?" Taragambire. Akagira ati, "Murugyemu, Sitaane!" Akagamba, kandi omwojo yaakira.

Ku Yaabugaine Legioni, arimu baadaimoni enkumi ibiri, tari Yesu owaatakire. Baadaimoni nibo baatakire bati, "Ku oraabe noozza kutubinga," oo, mugyenzi, "twohereze omuri guri mukumbi gw'empunu."

Yesu taragizire ati, "Hati, Taata, eki Nimbaasa kukikora?" Akagira ati, "Murugyeho," reero baadaimoni baahunga. Buzima, Akaba naamanya ngu ni Mesia.

101 Aha kituuro kya Laazaaro, akaba amazire kana afire. Baagira bati, "Kuri Obaire ori aha, Mukama, takufiire."

Yaagira ati, "Niinye kuzooka n'Amagara." Amiina! Ti nkahi, ryari, nari bata. "Orikuunyikiriza, n'obu yaakufa, aryaba ohuriire." Amiina. Akaba Naayemanya. Akaba naamanya eki Ari. Akaba naamanya ngu Ni Emanueli. Akaba naamanya ngu Niwe kuzooka. Akaba naamanya ngu Niwe Magara. Akaba naamanya ngu Omuriwe hakaba harimu Obwaruhanga bwona obureeberwa omu mubiri. Akareeba abo bantu bakye aho, kandi Akaba yaareebire ekyo eki Ruhanga yaabaire Amugambiire kukora obwire obwo, mbwenu Ngugwo aho. Yaashuma yaazayo.

Taragizire ati, "Hati, rindaho, naaza kutsimba amaju hanu. Mwena mutsimbe amaju kandi mushabe." Akagira ati, "Nimwikiriza ngu eki Nimbaasa kukikora?" Amiina. Yaakishaba.

Akaba Atariwe; nibo. "Yee, Mukama, naikiriza ku Ori Omwana wa Ruhanga otuura ari ow'okwija omu nsi." Oo, mugyenzi! Ngugwo aho ayorekirwe. Nihateekwa kugira ekintu ekyabaho.

"Laazaaro, shohora oije!" Akagamba, kandi omuntu ofiire yaashohora yaija. Tari, "Nimbaasa?" Akagamba kwonka. Okwikiriza ku kwabaireho, ekyo kintu kyabaho.

102 Naagamba, Akagamba, reero empumi zaareeba, ebirema byagyenda, ebifa-matu byahurira, baadaimoni baayamuza kandi baarugaho, abafu baazoorwa, buri kintu. Ahabw'enki? Tarashabire munonga. Akaba ari Mesia oshukirweho amajuta. Akaba ari Mesia ogwo. Akaba naamanya ngu Niwe. Akaba naamanya omwanya Gwe. Akaba naamanya eki Yaatumirwe kukora. Akaba naamanya ngu Ishe akaba Amworekire kuba Mesia, aha mwikiriza. Kandi ku yaabugaine omwikiriza ogwo oine okwikiriza, Akagamba Ekigambo kwonka. Baadaimoni baataataana. Eego, Sebo. "Gamba! Reka kutaka. Gamba!" Amiina.

Kandi Akaba naamanya obugabe Bwe obu Ruhanga yaamuhaire, kwonka itwe titurikubumanya. Akaba naamanya eki Ari. Itwe titurikukimanya.

Musa akaba ayebirwe. Samusooni akeetegyereza. Abandi bakeetegyereza. Yoshua akeetegyereza. Musa akeebwa. Kikeetaagisa Ruhanga kukimwijutsya. Yaagira ati, "Ahabw'enki Nontakira? Nkakutuma kukora omurimo ogwo. Gamba, kandi ogyende omu maisho aha kigyendererwa kyawe. Nkakugambira ngu oryaija aha rushozi oru. Twara abo bantu kandi obeebembere mugumizemu. Gamba kusha. Tindikufayo ekiri omu muhanda gwawe, kiihemu. Nkakuha obushoborozi bw'okukikora. Nkagamba . . . Okagamba enshohera n'emira, n'ebi'obuhangwa, n'ebintu nk'ebyo. Hati ahabw'enki Noonyomberera? Ahabw'enki noiija Ahariinye, nooborooga ahabw'ebintu ebi? Gamba kwonka reero orebe nikikorwa, nikyo ekyo kyonka." Oo, mugyenzi! Oo, ka ninkikunda!

103 Hanu, Yesu, buri kimwe eki Yaagambire, Akagamba Ekigambo kwonka, kandi kyaba nikwo kyaba. Ruhanga akaba yaaherize Kumuhamiza kimwe ngu n'Omwana We. "Ogu n'Omwana Wangye ou Nkunda ou Nyesiimira munonga. Mumuhurire."

Mumureebe. Eki ninkikunda. Ka Yaabaire ari emanzi, ka yaabaire Ayemerera n'obumanzi bwingi omu maisho G'abarikumukyema. Amiina. Akagira ati, "Musheenyeh hekalu egi, Naanye Ndyashaba Tata haza mureebe eki Araakikoreho?" Musheenyeh hekalu egi, Naanye Ndyagaruka ngiimutsye, omu biro bishatu." Atari, "Nyine amatsiko kukikora; naaza kugyezaho kukikora. " "Ndyakikora!" Ahabw'enki? Ekyahandiikirwe nikwo kirikugira.

Ekyahandiikirwe nikyo kimwe ekyagizire ngu Aryazoora omubiri Gwe, nikituha obushoborozi, Amaani! "Omu Iziina Ryangye baryabinga baadaimoni, baryagamba endimi nsya, ku barikwata enjoka, nari bakanywa ekirikwita kyona, tikiribarwaza; ku barita engaro aha barware, baryakira."

Ahabw'enki Nontakira? Gamba, kandi ogyende omu maisho. "Oo, n'obumanzi ni . . .

Musheenyeh hekalu egi, Ndyagaruka ngiimutsye. "Oo!

104 Kandi mwijukye hati, (turiyo nituhendera), akaba Ariwe ogwo omwe. Niwe Ogwo owaagambire, omuri Yohaana 14:12, e . . . "Orikuunyikiriza, emirimo ei Nkora nawe aryagikora." Tikwo kiri? [Abateeraine baagira bati, "Amiina." -Omur.] Niwe Ogwo owaakigambire.

Ni Yesu, owaagambire omuri Mako 11:24, owaagizire ati, "Ku origambira orushozi oru oti," ti ngu ku orishabira orushozi oru. "Ku origambira orushozi oru oti, 'tsinduka,' otarikubanganisa omu mutima gwawe, kwonka noikiriza ngu eki orikugamba nikiija kubakwo, oryakikorerwa." Hati iwe, ku oraakigambe nooteebereza kwonka, tikirikwija kubakwo. Kwonka ekintu omuriwe, ngu o-oshukirweho amajuta ahabw'omurimo ogwo, kandi okamanya ngu n'okukunda kwa Ruhanga kukikora, kandi okakigamba, nikiteekwa kubaho. "Ku wa . . ."

Eki Niwe yaakigambire. "Ku muraagume Omuriinye, n'Ebigambo Byangye byaguma omuriimwe, mushabe kyona eki murikwenda kiriyabakorerwa." Oo, mugyenzi! Oo, mugyenzi! Nimureeba eki ndikumanyisa? [Abateeraine baagira bat, "Amiina." -Omur.]

105 Munsaasire eki, kwonka kiriyo nikiinyijamu. Ninteeekwa kukigamba. Niwe yaagambire, ekiro kiri eruguru kuri, omuri eryo ihamba ati, "Toine nyamaishwa." Kandi Yaahanga zaakaamugye ishatu zaayemerera aho omu maisho gaitu. Niki? Okugamba ekigambo kwonka, oti, "Niziza kuba ziri hari, na hari, na hari," kandi zaabaho. Niwe yaakikozire.

Charlie, Rodney, Niwe eifo okwo omuri Kentucky; naiwe Nellie, Margie, hamwe naimwe abandi. Niwe, Ruhanga ogwo omwe owaabaire ari enyima okwo kandi owaagambiire Musa, akagira ati, "Ahabw'enki Nontakira? Gamba ekigambo!" Niwe yaazihangire zaabaho. Niwe. Niwe Ogwo. Oo, mugyenzi!

Niwe Yampaire okworekwa nk'omwaka gumwe oguhingwire, okwagambire ngu turyazayo, kandi Obumanyiso Mushanju obu, kandi n'oku haabaire nihaza kubaho o-o-o-okuhinda kw'amaani okwabaire nikuza kikitandikisa, kandi bakaba nibaza kuba bari omu muringo gwa piramidi. Kandi aho akatabo ka Look k'amahu- . . . akatabo k'amahurire ka Life kikaba kirimu, kihanikire aha kisiika okwo. Ekyo Niwe yaakigambire.

106 Niwe, ekiro ekyo obu naabaire ninshuma omu ruguuto orwo reero nkareeba egoye njoka mpango y'enyarubabi eri haihi kuteera murumuna wangye. Reero Yaagira ati, "Ohaire . . . okaheebwa Obushoboorozi bw'okugiboha, nari ezindi zoonia." Ekyo Niwe yaakigambire.

Aha mukyara wangye mukye w'omutwe gw'enju oshutami enyima okwo: Niwe akasheeshe ako, owansisiimwire aho omu kishengye, reero akeemerera omu nshonda, akagira ati, "Otatiina kukora ekintu kyona, nari kuza ahantu hoona, nari kugamba ekintu kyona, ahakuba Okubaho kwa Yesu Kristo okutaremwa kuri hamwe naiwe ahu oraaze hoona."

Niwe Ogwo eruguru kuri omu Nengo ya Sabino, nk'ameezi ashatu agahingwire, obu naabaire ninshaba, iiinyebuuza ekyabaire nokyenda kubaho. Nkaba nyemereire aho, reero rurara yangwa omu ngaro, reero Yaagira ati, "Egi ni Rurara y'Omugabe." Niwe.

Niwe yangambiire ati, "Nk'oku Naabaire ndi na Musa, nikwo Ndikwija kukutuma."

107 Niwe yangambiire, emyaka makumi ashatu echingwire, eifo kuri aha mugyera, ndi omutsigazi muto. Nyemereire aho nk'omubuurizi muto, aha mugyera, emyaka makumi ashatu echingwire, nyemereire aho obu Omushana ogwo, Enyomyo y'Omuriro niyo emwe, ekashuumma kuruga omu iguru kandi yaayemerera aho, reero Yaagira ati, "Nk'oku Naatumire Yohaana Omubatizi kubandiza okwija kwa Kristo kw'okubanza, Obutumwa bwawe nibwija kubandiza Okwija kwa Kabiri," omu nsi yoona. Kikaba nikibaasika kita, kunu omuriisa wangye we wenka yaakishekyereire kandi akakishungisa? Kwonka buzima kikabaho nk'oku kyagambirwe. Niwe yaakigambire. Eego, sebo!

Oo, ka Niwe yaagambire omu bunabi, omu kworekwa ati, "Obunaku buryahika." Niwe yaagambire ati, "Omwe omuriimwe ku ariragura, nari akareeba okworekwa, kandi akakugamba, haza kukabakwo; obwo mwijukye ngu tiwe, Niinye. Ndi hamwe nawe." Oo, mugyenzi! Nimbaasa kugumizamu, ningamba nti Niwe, Niwe, Niwe!

108 Niwe Ogwo owaashuumire, obu mbagambira nti hakaba hariho Enyomyo y'Omuriro eifo okwo aha mugyera, kwonka baayanga kukiikiriza. Niwe Ogwo owaabaire ari eifo okwo, omu Kishaayi kihango ekya Sam omuri Houston, obu ogwo mubuurizi Omubaputisiti, omu maisho g'abantu omutwaro ekiro ekyo, obu Maraika wa Mukama ogwo yaateerwa ekishushani, ayemereire aho. Niwe Ogwo, otahinduka, oku abaire ari nyomwabazyo, n'eriizooba nikwo ari, kandi nikwo ariguma ebiro byona.

Niwe owaaragwire ahu ebintu ebi bishemereire kuba. Niwe owaagambire eki. Niwe owaakozire ebintu ebi. Tahinduka, oku abaire ari nyomwabazyo n'eriizooba nikwo ari, kandi nikwo ariguma ebiro byona. Buzima Akozire ebintu byona nk'oku Yaagambire ngu Aryabikora. Amiina.

Ahabw'enki nintegyereza? Ruhanga ahamize Ekigambo. N'Amazima. Ka tugumizemu orugyendo. Ka tutambure. Tugumizemu omu omuhanda gwa Mukama, tujuure okubanganisa kwona, ebibi byona. Tushemeze enju, tugikuute yoona.

Nk'oku okworekwa kwa Junior Jackson kwagambire, tihariho ekyatsigaireho kureka etabaaza; nimmanyisa ekirooto kye, ku araabe ashutami hanu. Tihariho ekitsigaire kureka etabaaza, kandi zikaba zeehinguririziibwe emidarizo y'ezaabu, omu kirooto eki yandootoreire ekiro kiri. Oo, mugyenzi!

109 Ow'eish-emwe Collins, oteemereza omutima ahabw'eky'enyanja ekyo. Kikaba kiri ekya mutare. Toramanyire

oku oraakitwaze.

Mujuure ebindi byona Ebirikukihakanisa. Mwijukye, aga n'Amazima, n'obu Gaakuba nigareebeka gata nk'okurengyesereza omu kwikiriza, n'ebindi byona, obumwe n'obumwe. Mugumizemu Nago buzima. N'Omwoyo Orikwera. Ruhanga ogwo omwe owaazoire Yesu Kristo omu bafu, ogwo Omwe orikubaasa kugamba ebintu bikahangwa, ogwo Omwe owaabaire ariho omu biro bya Musa, niwe ogwo n'eriizooba.

Okweta Kwe omu biro ebi eby'aha muheru, Akuhamize. "Nk'oku kyabaire omu biro bya Sodoma, nikwo kiriba kityo n'omu Kwija kw'Omwnana w'omuntu." Akozire . . . Ngigyo Sodoma eifo okwo. Ngugwo Billy Graham na Oral Roberts ebiso okwo. Kandi n'Ekanisa neegyenda omu maisho, n'obumanyiso nibwo bumwe obu Yaaraganiise, emyanya yombi, mbwenu mbubwo aho. Niwe yaakigambire.

Ai Mukama, mpa obumanzi, nikwo kushaba kwangye. Mpwera, Ai Mukama Ruhanga.

Nintekwa kurekyera aha. Twakyerererwa.

110 "Ahabw'enki Nontakira? Ahabw'enki oriyo Nontakira, kunu Naaherize kuhamya ku Ndi hamwe naiwe? Tinkirize abarwaire baanyu," nikwo Yaakugamba? Tindabagambiire ebintu bikabaho buzima? Omuriisa waanyu tarikubaasa kukora ekyo. Niinye! Tarikubaasa; we n'omuntu. Niinye, Mukama, "okwo nikwo Akaagamba. Niinye Owaakozire eki. Niinye Omugambira ebintu ebi ngu abigambe. Tariwe. N'Eiraka Ryangye. Niinye Ozoora abafu baanyu ku bafa. Niinye Otambira abarwaire. Niinye Ogamba ebintu ebi bitakabaireho. Niinye Ojuna. Niinye Oraganisa."

Ai Ruhanga, mpa obumanzi bw'okukwata Rurara egyo y'Ekigambo ei Yaataire omu ngaro zangye nk'emysaka makumi ashatu na ishatu ehwiringe, reero ngihamyehaza ntambure ngyende omu maisho mpikye omu Kukurura kwa Kashatu, nikwo kushaba kwangye.

Ka twinikye emitwe yaitu.

111 Taata ow'omu Iguru, obwire bwine nibuhwayo, kwonka Ekigambo kiriyo nikiba eky'eicweka. Nk'oku turikukireeba, Mukama, buri bwire, Okubaho kwa Kristo okutaremwa burijo kuba naitwe. Ka Ninkusiima ababw'oburungi Bwawe! K'oturekireho kandi tukaba . . . kandi okatuha omugisha, ka Nitukikusiimira!

Nk'oku nkwartsire ebitambaara ebi omu ngaro zangye, Mukama, n'eb'yabantu abaine okwikiriza, abaikiriza Eki. Ka buri daimoni, buri burwaire burugye aha bantu abo. Nindagiira buri mwoyo oguri hanu; omubi, ogutari gwa Ruhanga, buri mwoyo gw'oburwaire, endwara zoona n'okubonabonesa. Titubyami omu kicuucu ky'omuntu, nakyo ekyakubaire kitaine nshonga, kureka turi omu kicuucu ky'Engiri, Engiri ehamiibwe.

Enyomyo y'Omuriro nkuru yaaba neegyenda omu maisho n'eniyima omu kyombeko eki, egyo Emwe ei Ruhanga yaareebeiremu ahansi, reero Enyanja Erikutukura ekeebaganisamu, kandi Abaisraeli bakarabamu. Kwonka hati Yaaba naareeba, emisiirwe Eshagama y'Omwnana We, nikwo kusaasira n'embabazi. Ninshaba ngu tube abarikworoba. Ninshaba ngu eriizooba turekye kugamba, kutaka. Ka tumanye ngu Otwetsire ababw'omurimo ogu. Egi niyo shaaha. Ninkigamba omu Iziina rya Yesu Kristo, ka buri ndwara erugye omuri ogu mwanya.

112 Ka buri mushaija n'omukazi, otakira Eiziina rya Yesu Kristo, ayeze amagara ge busya eriizooba. Niinyeza agangye, Mukama, aha itambiro ry'okushaba. Ninjuumara ahansi, kandi nkwatwa enshoni kandi nyinika omutwe gwangye ahansi ahu Waanyihire. Mukama Ruhanga, ninkwatwa enshoni ababw'obweremwa bwangye hamwe n'obutaikiriza bwangye. Ebyo Binsaasire, Mukama. Mpa obumanzi. Twena tuhe obumanzi.

Niinyehuriramu, nka Musa, twena turi omu muhanda gwaiitu niturugayo. Titurkwenda kutsiga n'omwe. Nitwenda kutwara buri omwe, Mukama. N'Abaawe. Nimbakugarurira. Heereza omugisha abantu aba eriizooba, Mukama. Kituhe. Kandi mpa omugisha, hamwe nabo, Taata, kandi Eiziina Ryawe niriza kuhimbisibwa. Ekitiinisa Kyawe nikiza kuba Ekyawe. Tuhereze okwikiriza oku Okutahwaho, Mukama, obwo turiyo nitwehayo Ahariiwe hati.

113 Nyowe, nkwartsire ahari Baiburi egi kandi n'aha kituuti eki, Ninkuha amagara gangye, Mukama. Mpamiire aha kuraganisa kwona oku Waahaire. Nimmanya ngu nikwija kuhikiirira. Nimmanya ngu n'Amazima. Mpa obumanzi bw'okugamba Ebigambo ebi. Mpa obumanzi, Mukama. Nyebembera omu bi ndakore hamwe n'ebi ndaagambe. Niinyehayo Ahariiwe, hamwe n'ekanisa egi, nayo, Mukama, omu Iziina rya Yesu Kristo. Amiina.

Okwikiriza kwangye Niiwe . . . amaisho,

Iwe Mwana gw'Entaama 'we Owaabambirwe,

Mujuni Ruhanga;

Mpurira hati naaba ninshaba,

Onyiheho ebibi byangye byona,

Ka kuruga eriizooba

Mbeere kimwe Owaawe!

Hati ka twemerere, tucecekire buzima, obwo turiyo nitukyeshongora tubumbire eminwa. [Ow'eishe-emwe Branham hamwe n'abateeraine baatandika kweshongora babumbire eminwa, Okwikiriza Kwangye Niwe Kuhangire Amaisho -Omur.]

Niiwe ku . . . ,

Iwe Mwana gw'Entaama . . .

Ka Tumwimukize emikono yaitu hati.

Ai Mujuni . . .

Mweheyo ahari Ruhanga hati.

Mpurira hati naaba ninshaba,

Onyiheho okubanganisa kwangye kwona,

Ka kuruga eriizooba

Mbeere kimwe Owaawe!

114 Hati twena hamwe, twereerize emikono yaitu. [Abateeraine baagarukamu eshaara egi, nibakuratira Ow'eishe-emwe Branham -Omur.] Mukama Yesu, [Mukama Yesu,] hati [hati] niinyehayo Ahariiwe, [niinyehayo Ahariiwe,] amagara g'okuheereza, [amagara g'okuheereza,] agashemeire okukiraho, [agashemeire okukiraho,] okwikiriza okurukukiraho, ninkutakira, [okwikiriza okurukukiraho, ninkutakira,] kugira ngu [kugira ngu] mbone kuba omuheereza orikusimwa okukiraho [mbone kuba omuheereza orikusimwa okukiraho] omu magara gangye ag'omu maisho, [omu magara gangye ag'omu maisho,] kukira oku mbaire ndi [kukira oku mbaire ndi] omu magara ag'enyima. [omu magara ag'enyima.] Nsaasira obutaikiriza bwangye, [Nsaasira obutaikiriza bwangye,] reero otugarurire [reero otugarurire] Okwikiriza [Okwikiriza] oku abarikwera baahairwe rimwe kikahwa. [oku abarikwera baahairwe rimwe kikahwa.] Niinyehayo Ahariiwe, [Niinyehayo Ahariiwe,] omu Iziina rya Yesu Kristo. [omu Iziina rya Yesu Kristo.]

Hati twinikye emitwe yaitu.

Naaba nindaba omu mianda eshobenkaine y'amagara agarimu omwirima,

Kandi nyehinguririziibwe enaku,

Ombeere omwebembezi;

Ragiira omwirima guhindukye omushana,

Ihaho obwoba bwangye bwona,

Otarindeka nkahaba

Nkakurugaho.

115 Hati twinikire emitwe yaitu hati. Nimuhurira orikushusha oti Obutumwa bw'akasheeshe bwabombeka? [Abateeraine baagira bat, "Amiina." -Omur.] Bwabagaruramu amaani? ["Amiina."] Ku buraabe bukikozire, imutsya emikono yaawe ahari Ruhanga, ogire oti, "Ninkusiima, Ai Ruhanga." ["Ninkusiima, Ai Ruhanga."] Emikono yangye yombi ngimukize ahaiguru, ahabw'okuba niinyehurira ntyo ngu bwa-bwampwera. Bwangeruramu amaani.

Ebuntu bimwe ebi naagamba, mbaire ntarikuteekateeka ngu ninza kubigamba, kwonka byaherize kugambwa. Byaba biri eby'okumpana. Nyeshangire ntari omu muhanda ogu mbaire ninteeekateeka ngu ndimu, kureka naayeshanga nsingirwe orubanja rw'okuguma nintaka obwire bwona, omu mwanya gw'okugamba.

Ruhanga, mpwera, okuruga eshaaha egi n'okugumizamu, mbaase kuba omuheereza orikwehayo okukiraho.

Tindikweshabira nyowe nyenka. Naimwe, nimbashabira, kugira ngu, twena hamwe, nk'Omubiri gwa Kristo, abeetsirwe kuruga omu by'ensi, tweteekateekyere kuza omu Nsi eyaaraganisiibwe, kugira ngu Ruhanga ampe obumanzi bw'okugamba omuhanda, kushoboorora omuhanda kurungi kugira ngu mutaija kubura ekirari. Niinyija kubagambira, ahabw'embabazi za Ruhanga, ninza kukuratira endibatiro z'Eshagama y'Ogwo Owaatwebembeire.

Kandi ndyayekorera omusharaba ogu ogwahairweyo,

Okuhitsya obu okufa kurinduhuura,

Reero nkataaha omu Ka, kujwara ekirunga,

Hariyo ekirunga ekimbiikiirwe.

Eki Nitukikuha, Taata, okwehayo kwaitu, omu Iziina rya Yesu Kristo, Omwana Waawe. Amiina.

116 [Ow'eishe-emwe yaatandika kugamba omu rundi rurimi. Omwanya oguriho busha aha rutambi rw'amaraka - Omur.]

Nitusiima Mukama ahabw'eki. Mugyendere omu magara ageeziibwe. Mweheyo, omu burungi, obucureezi. Mugyendere omu Mwoyo. Mugyende, mugambe, mujware, mutwaze nk'Abakristaayo, abacureezi kandi barungi. Mutatuma eki kyaremwa hati. Eiraka rya Ruhanga rigamba nirirabira omu Kigambo, rigamba nirirabira omu biconco. Ekiconco kimwe ku kiija, ekindi kikishuuura, ekindi kiconco kiija kandi kyoreka ekintu nikyo kimwe. Mwareeba, ekyo buzima nikiikirizana n'Ekigambo hamwe n'obwire obu. Ruhanga ari hamwe naitwe. Ka Nitumusiiima ahabw'ekyo! Hati kuri . . .

Twinikire emitwe yaitu, ow'eishe-emwekazi mugyenzi waitu kuri naatuha eiraka rya:

Twara Eiziina rya Yesu,

Nk'engabo y'okukukingira buri mutego;

Ebigyezo ku biraakwetooroore, Itsya Eiziina eryo erirkwera omu kushaba.326. Kyonka, kyonka ekyo ba arikyo waakora, gamba Ekigambo kandi ogambe Eiziina Rye. Ka tweshongore hati obwo turiyo-turiyo nitusiibuurwa.

Twara Eiziina rya Yesu,

Nk'engabo . . . n'enaku;

Niriija kukuha okushemererwa kandi rikuhuumuze,

Oo, ritware hoona hoona ahi oraaze.

Eiziina ry'omuhendo . . .

Hati ka tukwatane omu ngaro, kandi tugire tuti, "Ninza kukushabira, ow'eishe-emwe, naiwe onshabire."

. . . Iguru;

Eiziina ry'omuhendo, Eiziina ry'omuhendo, O ka nirirungi!

Matsiko g'ensi kandi okushemererwa . . .

Hati twinikire emitwe yaitu, ka tweshongore ekicweka eki ekirikukurataho.

Eiziina ry'omuhendo, Eiziina ry'omuhendo; O ka nirirungi! O ka nirirungi!

Matsiko g'ensi kandi okushemererwa kw'Eiguru;

Eiziina ry'omuhendo, O ka nirirungi!

Matsiko g'ensi kandi okushemererwa kw'Eiguru;

117 Twinikire emitwe yaitu hati, hamwe n'emita yaitu, n'okumanya ngu Yesu akagira ati, "Orikuhurira Ebigambo Byangye kandi akaikiriza Owantumire, aine Amagara agatahwaho kandi tariza mu Rubanja, ahabw'okuba aherize kuruga omu kufa yaataaha omu Magara." Turikumanya ngu itwe, ahabw'embabazi za Ruhanga, ekyo tukiine omu mitima yaitu; nitwehayo Ahariwe akasheeshe aka, kugira ngu amagara gaitu gahindukye, okuruga eriizooba n'okugumizamu, nikwo tweyongyere munonga kuteekateeka ebirkwombeka. Nituza kugyezaho kutuura omu burungi n'obucureezi, reero nitwikiriza ngu eki turaashabe Ruhanga, Ruhanga naija kukiha buri omwe. Kandi tituraaze kugambanaho kubi, nari omuntu weena. Nituza kushabira abazigu baitu kandi tubakunde, tukorere gye abarikutkorera kubi. Ruhanga niwe Muramuzi w'ohikire n'ogwire. Na . . .

Kurugiirira ahari eki, kandi n'emitwe yaitu einikire, naaza kushaba munywani waitu omurungi, Ow'eishe-emwe Lee Vayle, ku araabe naabaasa kusiibuura abateeraine n'eshaara. Ow'eishe-emwe Vayle.



[www.messagehub.info](http://www.messagehub.info)

Obutumwa obu bukabuurirwa  
**William Marrion Branham**  
“... omu biro by'eiraka ...” Kush 10:7